

**Sumáriu Kazu****Tribunál Distritál Dili****Abril 2019**

Afirmasaun: Sumáriu Kazu ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Dili**1. Totál kazu ne'ebé JSMP monitoriza : 40**

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	26
Artigu 146 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade física grave ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	1
Artigu 154 KP	Maus tratus ba kónjuje	3
Artigu 177 KP	Abuzu Seksuál ba menór	1
Artigu 172 KP	Violasaun seksuál	2
Artigu 178 KP	Aktu seksuál ho adolexente	1
Artigu 172 & 173 (d) KP	Violasaun seksuál ho agravasaun	1
Artigu 172, 173 (d) & 145 KP	Violasaun seksuál ho agravasaun no ofensa ba	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

artigu 2, 3(a), 35(b) no 36 LKVD	integridade fízika simples ho natureza violénsia doméstika	
Artigu 142 KP no artigu 224 (1) KP	Infantisídiu no destruisaun, subtrasaun, okultasaun ka profanasaun ba kadaver	1
Artigu 184 KP	Devasa	1
Artigu 257 (1) no 267 KP	Krime abuzu konfiansa agravadu no burla agravada	1
Artigu 303 no 299 KP	Falsifikasaun ba dokumentu ka notasaun téknika no partisipasaun ekonómika	1
Totál		40

2. Totál desizaun ne'ebé JSMP monitoriza : 29

Tipu Pena	Númeru
Pena prizaun (Artigu 66 KP)	2
Suspensaun ba prizaun nia ezekusaun (Artigu 68) KP	14
Suspensaun ba prizaun nia ezekusaun (Artigu 68) KP ho regra ba konduta (Artigu 70 (g) KP	3
Suspensaun ba prizaun nia ezekusaun (Artigu 68) KP no indemnizasaun sivíl (Artigu 69(a) KP	2
Suspensaun ba prizaun nia ezekusaun (Artigu 68) KP no husu deskulpa ba ofendidu iha públiku (Artigu 69(b) KP	1
Multa (Artigu 67) KP	4
Admoestasaun (Artigu 82) KP	1
Absolve	2
Totál	29

3. Total kazu sira ne'ebé adia tuir JSMP nia monitorizasaun : 1

Razaun adiamentu	Númeru
Polísia la halo mandadu detensaun ba arguidu tuir tribunál nia orientasaun	1
Totál	

4. Totál kazu sira ne'ebé sei kontinua tuir JSMP nia monitorizasaun : 10

B. Deskripsaun sumariu ba desizaun kazu sira ne'ebé JSMP monitoriza:

1. Krime maus tratus ba kónjuje

Nú prosesu : 0095/17 PDDIL

Kompozisaun Tribunál : Koletivu

Juis : Dra. Zulmira M. Auxiliadora Baros da Silva, Dra. Ana Paula
Fonseca no Dr. Eusébio Xavier Vitor
Prokuradór : Dr. Bartolomeu de Araújo
Defeza : Dr. Jonas Henrique da Costa
Desizaun : Pena prizaun tinan 3 suspende tinan 4 ho regra ba konduta

Iha 03 Abril 2019, Tribunál Distrital Dili prezide julgamentu leitura sentensa ba krime maus tratus ba kónjuje ne'ebé envolve arguidu MBR hasoru nia feen, iha Distritu Dili.

Akuzasaun Prokuradór

Prokuradór akuza katak iha 22 Dezembru 2017, maizumenus iha oras tuku 23:30 kalan, arguidu tolok lezada no duni sai lezada hosi uma tanba deskonfia lezada iha relasaun domin ho mane seluk. Iha tempu hanesan, arguidu tuku dala ida iha lezada nia kotuk-laran, tuku dala ida iha lezada nia reen-toos no hodi liman fuan fai tama ba iha lezada nia inus-kuak. Arguidu mós foti kadeira ai ida atu tuda ba lezada maibé la konsege tuda tanba lezada hakilar maka'as halo sira nia oan mane (CDO) halai tama ba uma laran no hapara arguidu nia asaun ne'e. Hafoin ida-ne'e, arguidu foti fali gazolina, fakar ba iha kuartu-laran no atu sunu tisu ho iskeiru maibé CDO hadau tiha eskeiru no tisu husi arguidu.

Arguidu sempre halo agresaun ba lezada tantu fíziku no psíkiku desde sira moris hamutuk iha tinan 1994, hanesan ameasa, koa'lia liafuan aat ba lezada, tuda xikra ba lezada no tebe lezada nia isin-loloon.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál husi tinan 2 to'ó tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu hili direitu nonook. Enkuantu lezada kontinua konfirma faktu sira iha akuzasaun no deklarata katak arguidu nia hahalok halo lezada la sente haksolok no seguru desde moris hamutuk ho arguidu. Iha tribunál, lezada konfirma katak nia lakohi fila ba moris hamutuk ho arguidu. Antes akontesimentu ne'e, iha tinan 2016 lezada ho sira nia oan na'in tolu ba hela hamutuk ho lezada nia inan-aman maibé arguidu ba bolu fila fali lezada no oan sira. Enkuantu sira nia oan mane boot kontinua hela ho arguidu.

Iha parte seluk, bainhira juis husu ba arguidu hodi hato'ó liafuan ikus antes ba desizaun, arguidu deklarata katak faktu baku bebeik lezada ne'e, la loos.

Alegasaun final

Prokuradór konsidera faktu hotu provadu tanba maske arguidu hili direitu nonook maibé lezada kontinua konfirma faktu sira iha akuzasaun. Lezada mós espresa iha tribunál katak nia nunka

sente haksolok no seguru tanba arguidu nia hahalok. Prokuradór husu ba tribunál atu kondena arguidu ho pena prizaun mínimu hosi moldura penál ba krime ida ne'e no suspende ba tinan haat.

Enkuantu defeza husu ba tribunál atu fó justisa ne'ebé justu ba arguidu no husu ba tribunal atu konsidera arguidu nia liafuan ikus ne'ebé deklara katak faktu balun iha akuzasaun la loos.

Desizaun

Depoisde avalia faktu hotu ne'ebé prodús iha julgamentu, tribunál konsidera faktu hirak ne'e provadu hotu bazeia ba deklarasaun husi lezada nian. Bazeia ba faktu provadu sira ne'e, tribunál konklui no kondena arguidu ho pena prizaun tinan tolu suspende ba tinan haat no aplika regra ba konduta atu arguidu apresenta-an ba tribunál periodikamente fulan ida dala ida, durante tinan rua iha tinan rua primeiru.

2. Krime ofensa ba integridade fízika simples ho natureza violénsia doméstika

Nú. Prosesu : 0200/18.ERSIC
Kompozisaun Tribunál : Singulár
Juis : Dr. Ivan José S. Patrocínio Antonino Gonçalves
Prokuradór : Dr. Osorio de Deus
Defeza : Dr. Afonso Gomes
Desizaun : Pena prizaun fulan 6 suspende ba tinan 1

Iha 04 Abril 2019, Tribunál Distritál Dili liuhusi julgamentu movel iha Distritu Ermera, prezide julgamentu leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu HSM hasoru nia feen, iha Distritu Ermera.

Akuzasaun Prokuradór

Prokuradór akuza katak iha 30 Jullu 2018, iha oras tuku 18:00 lokraik, lezada hirus nia oan BM tanba lakohi atu tau-matan ba nia alin sira atu nune'e lezada bele ba faan modo iha merkadu hodi sustenta sira nia moris loroloron. Iha momentu ne'ebá, lezada hateten ba BM dehan "se imi lakohi haree labarik sira, di'ak liu imi sai husi uma ne'e". Bainhira arguidu rona lezada ko'alia hanesan ne'e ba sira nia oan, arguidu hamriik no baku rahun sasan uma laran nian hanesan kadeira masa rua, koluna gravadór tolu no televizaun ida.

Haree arguidu nia hahalok ne'e, lezada tenta tuku arguidu maibé la kona tanba arguidu sata-netik ho nia liman no arguidu fila tuku dala ida iha lezada nia matan-fukun no tuku dala ida iha lezada nia kanuruk. Lezada foti katana ne'ebé tau hela iha meja leten maibé arguidu hadau tiha katana ne'e husi lezada nia liman, nune'e katana ko'a arguidu nia liman rezulta kanek no ran.

Arguidu kontinua tebe dala ida iha lezada nia kabaas halo lezada oin nakukun no monu tun ba rai. Depoisde ida-ne'e, arguidu foti sasan hirak ne'ebé arguidu baku rahun no lori sai ba li'ur atu

sunu, maibé la konsege sunu tanba viziñu ba sata-netik. Aktu hirak-ne'e halo lezada sofre moras iha matan-fukun, kanuruk no kabaas. Hafoin akontesimentu liutiha loron ida, lezada ba hato'o keixa iha polisia, Eskuadra Gleno-Ermera.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu no deklarata katak nia baku lezada tanba aleinde lezada hirus sira nia oan, lezada mos tolok. Nune'e mos lezada kontinua reforsa faktu sira iha akuzasaun no konfirma ho arguidu nia deklarasaun katak nia tolok duni sira nia oan no diskute malu ho arguidu to'o arguidu baku rahun sasan sira hotu. Mezmu nune'e, lezada deklarata katak sira di'ak malu ona no rezolve ona problema ne'e tuir lisan Timor nian.

Alegasaun final

Prokurador konsidera arguidu provadu komete faktu sira iha akuzasaun bazeia ba arguidu nia deklarasaun ne'ebé konfirma liutan hosi lezada. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak arguidu konfesa no deklarata katak nia komete krime ne'e tanba la simu lezada tolok sira nia oan. Tanba ne'e, husu ba tribunál atu kondena arguidu ho pena ne'ebé adekua.

Desizaun

Depoizde avalia faktu sira ne'ebé prodús iha julgamentu, tribunál konsidera katak arguidu provadu komete faktu sira iha akuzasaun bazeia ba arguidu nia konfisaun no konfirmasaun hosi lezada. Bazeia ba faktu provadu sira ne'e, tribunál konklui prosesu ne'e no kondena arguidu ho ho pena prizaun fulan neen suspende ba tinan ida.

3. Krime ofensa integridade fizika simples ho natureza violénsia doméstika

Nú. Prosesu	: 0131/17.DICMR
Kompozisaun Tribunál	: Singulár
Juis	: Dra. Francisca Cabral Marques
Prokurador	: Dr. Bartolomeu de Araújo
Defeza	: Dra. Joana Christina Pinto
Desizaun	: Pena prizaun fulan 3 suspende ba tinan 1

Iha 05 Abril 2019, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AM hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha loron no fulan la apuradu maibé iha tinan 2017, iha oras tuku 12:00 meudia, lezada simu telefone husi ema (mane) ne'ebé atu hola kupon SDSB (*Sumbangan Dermawan Sosial Berhadiah*). Bainhira arguidu rona lezada konverse ho ema ne'e, halo arguidu deskonfia lezada iha ona amante. Arguidu tolok no tuku dala ida iha lezada nia ulun sorin karuk no tuku dala ida iha ulun sorin loos no tuku dala ida iha lezada nia kabun. Arguidu mós trata lezada ho liafuan aat katak se lezada hakarak, nia fó hatete ba nia kolega sira mai halo relasaun seksuál lisuk ho lezada. Arguidu ninia hahalok ne'e halo lezada sofre moras iha ulun, kabun no sente moe teb-tebes ho arguidu nia liafuan ne'e. Mezmu lezada sente moras iha ninia isin lolon maibé lezada la ba halo tratamentu iha sentru saude maibé hola deit aimoruk *paracetamol* iha *apotik*.

Prokuradór mós akuza katak durante arguidu ho lezada forma uma kain desde tinan 2015, arguidu sempre baku lezada maibé lezada la hato'o keixa ba polisia.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál husi tinan 2 to'o 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu rekoñese katak nia deskonfia duni lezada iha relasaun amante ho mane seluk maibé rejenta kona-ba faktu tuku iha lezada nia ulun sorin karuk, ulun sorin loos no kabun. Tuir arguidu, nia la tuku maibé basa dala ida iha ulun sorin karuk, dala ida iha ulun sorin loos no dala ida iha kabun. Nune'e mós, arguidu rejenta trata lezada ho liafuan mal. Arguidu deklarata katak depoisde akontesimentu ne'e, sira rezolve problema ne'e tuir dalan familiar.

Enkuntu lezada konfirma hotu faktu sira iha akuzasaun no deklarata katak desde sira forma uma kain arguidu sempre baku maibé la ba hato'o keixa. Lezada ba hato'o keixa iha akontesimentu ikus tanba lezada konsidera arguidu nia hahalok grave tebes no halo lezada moe tebes ho arguidu ninia liafuan. Lezada mós reforsa arguidu nia deklarasaun katak sira di'ak malu ona no depoisde akontesimentu ne'e, arguidu la baku ona lezada.

Alegasaun finál

Prokuradór konsidera arguidu provadu komete krime tuir faktu sira iha akuzasaun mezmu arguidu nega katak la tuku maibé basa deit. Arguidu mós nega katak la ko'alia liafuan mal hasoru lezada. Mezmu nune'e, lezada ne'ebé sofre husi arguidu ninia hahalok mantein faktu sira no deklarata katak desde sira moris hamutuk arguidu sempre baku lezada. Bazeia ba konsiderasaun hirak ne'e, husu ba tribunál atu kondena arguidu ho pena prizaun tinan ida fulan neen suspende ba tinan rua.

Enkuantu defeza, husu ba tribunál atu kondena arguidu ho pena ne'ebé adekuaudu ho konsiderasaun ba sirkunstánsia atenuante sira hanesan arguidu arrepende ona ninia hahalok no arguidu foin mak primeiravés hatan iha tribunál.

Desizaun

Depoide avalia faktu sira hotu, tribunál konsidera arguidu ninia hahalok la prenxe elementu sira husi krime maus tratus ba kónjuje. Tribunál halo alterasaun jurídiku husi krime maus tratus ba kónjuje ba fali krime ofensa ba integridade fízika simples tuir artigu 145 KP. Tribunál prova katak arguidu tuku duni lezada dala tolu; dala ida iha lezada nia ulun sorin loos, dala ida ulun sorin karuk no dala ida iha kabun. Tribunál mós prova katak arguidu trata lezada ho liafuan mal. Bazeia ba faktu provadu no konsiderasaun sira hotu, tribunál konklui no kondena arguidu ho pena prizaun fulan tolu suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0134/18.ERSIC
Kompozisaun Tribunál : Singulár
Juis : Dr. Ivan José S. Patrocínio Antonino Gonçalves
Prokuradór : Dr. Osorio de Deus
Defeza : Dr. Afonso Lopes
Desizaun : Pena prizaun tinan 1 suspende ba tinan 1 fulan 6

Iha 05 Abril 2019, Tribunál Distritál Dili liuhusi julgamentu movel, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FS hasoru nia feen no oan feto (IS), iha Distritu Ermera.

Akuzasaun Prokuradór

Prokuradór akuza katak iha 01 Juñu 2018, iha oras tuku 15:40 lokraik, arguidu ho lezada (feen) fila husi faan kafé iha merkadu no arguidu sosa ho tua sabu botir ida ho folin US\$0.25. Bainhira to'o iha uma, arguidu hemu kedas tua sabu ne'e to'o lanu no arguidu bolu sira nia oan (IS) ne'ebé halo hela modo iha dapur maibé sira nia oan la rona. Arguidu ba tuir IS iha dapur laran no foti kanuru hodi suru mina iha tasu laran no rega ba lezada nia liman parte loos halo lezada tanis no halai ba kafé laran.

Arguidu duni tuir lezada ba iha kafé laran, arguidu toman lezada IS no basa dala rua iha lezada nia hasan sorin loos no dala ida iha hasan sorin karuk. Hafoin arguidu ka'er lezada nia fuuk no buti lezada nia kakorok.

Lezada FB nu'udar arguidu nia feen halai tuir ba iha kafé laran no foti ai-kafé ida no baku dala ida iha arguidu nia kelen sorin karuk atu arguidu bele husik lezada IS. Arguidu husik duni lezada IS maibé fila tuku kedas dala ida iha lezada FB nia kelen sorin loos no tuku dala ida iha lezada

nia tilun-hun sorin karuk. Arguidu nia hahalok halo lezada IS sofre moras no mean iha liman, hasan no kakorok. Enkuantu lezada FB sofre moras iha kelen no tilun-hun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu no deklarata katak nia halo hahalok ne'e tanba nia ho kondisaun lanu. Maibé, depoisde akontesimentu iha loron tuir mai, arguidu husu deskulpa ba nia feen ho oan no promete sei la repete ninia hahalok ne'e hasoru lezada sira iha futuru.

Lezada na'in rua konfirma faktu sira iha akuzasaun no konfirma mós katak arguidu husu ona deskulpa ba lezada sira no promete sei la halo tan hahalok hanesan iha futuru. Aleinde ne'e, lezada sira deklarata katak arguidu foin halo hahalok hanesan ne'e durante sira moris hamutuk.

Alegasaun finál

Prokuradór konsidera arguidu provadu komete krime tuir faktu sira iha akuzasaun tantu hasoru arguidu nia oan fetu no feen. Maski arguidu arrepende no di'ak malu ona ho lezada sira, tribunál tenke kondena nafatin arguidu atu asegura arguidu la repete tan ninia hahalok iha futuru. Tanba ne'e, husu ba tribunál atu kondena arguidu ho pena prizaun tinan ida suspende ba tinan rua.

Enkuantu defeza husu ba tribunál atu kondena arguidu ho pena ne'ebé justu tanba arguidu arrepende ninia hahalok, arguidu husu ona deskulpa ba lezada sira no foin mai hatan iha tribunál.

Desizaun

Tribunál konsidera katak arguidu provadu komete krime hasoru lezada sira bazeia ba arguidu nia konfisaun no depoimentu hosi lezada sira. Tribunál prova katak arguidu suru mina iha tasu laran no rega ba lezada IS nia liman parte loos, basa dala rua iha hasan sorin loos no karuk. Arguidu mós ka'er lezada IS nia fuuk no buti lezada nia kakorok. Tribunál mós prova katak arguidu tuku dala ida iha nia feen nia kelen sorin loos no tuku dala ida iha tilun-hun sorin karuk. Arguidu nia hahalok hirak ne'e halo lezada IS sofre moras no mean iha liman, hasan no kakorok no lezada nu'udar arguidu nia feen sofre moras iha kelen no tilun-hun.

Tribunál konklui prosesu ne'e no kondena arguidu ho pena prizaun fulan sia ba krime ne'ebé arguidu halo hasoru lezada IS no pena prizaun fulan sia ba krime ne'ebé arguidu halo hasoru nia feen. Husi krime rua ne'e, tribunál akumulata no kondena arguidu ho pena únika prizaun tinan ida suspende ba tinan ida fulan neen.

5. Krime ofensa ba integridade fízika simples ho natureza violénsia doméstika no krime ameasa

Nú. Prosesu : 0118/16.LILIQ
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Bartolomeu de Araújo
Defeza : Dr. Jonas Henrique da Costa
Desizaun : Pena prizaun tinan 2 suspende ba tinan 4 ho regra ba konduta

Iha 05 Abril 2019, Tribunál Distrital Dili prezide julgamentu leitura sentensa ba krime ofensa ba integridade fízika simples ho natureza violénsia doméstika no ameasa ne'ebé envolve arguidu AdJ hasoru nia feen, iha Distritu Likisá.

Akuzasaun Prokuradór

Prokuradór akuza arguidu katak iha 04 Novembru 2016, lezada ho nia oan na'in tolu inklui ho lezada nia kolega feto ida (AX) ba han hamutuk iha lezada nia tiun (JS) nia uma. Iha kalan fahe rua (tuku 00:00 kalan), arguidu ba tuir lezada no obriga lezada ho nia oan sira fila-fali ba sira nia uma. Maibé lezada lakohi atu fila tanba kalan bo'ot ona no distánsia dook. Lezada mós dehan ba arguidu atu sira toba deit no iha dadeer mak sira fila ba uma. Maibé arguidu la konkorda no tebe dala tolu iha lezada nia matan-fukun, halo lezada oin nakukun no monu tun ba rai. Arguidu rasta lezada nia liman no dada sai lezada ba li'ur no iha kalan ne'e arguidu no lezada ho sira nia oan na'in tolu inklui lezada nia kolega AX fila kedas ba sira nia uma. Iha dalan, arguidu tebe dala barak iha lezada nia kabun mezmua iha momentu ne'ebá lezada isin rua fulan ualu. Sira to'o iha uma maizumenus iha oras tuku 01:30 madrugada.

Bainhira lezada ho sira nia oan inklui lezada nia kolega AX toba dukur hela, arguidu fanu lezada ho katana iha liman no haruka lezada sai ba li'ur, atu husu buat ruma ba lezada. Iha li'ur, arguidu haruka lezada hamriik ho pozisaun hamrik-loos no arguidu ameasa atu taa fera lezada nia kabun hodi hasai labarik iha lezada nia kabun-laran. Rona arguidu ko'alia hanesan ne'e, lezada sente ta'uk no hako'ak metin lezada nia kabun to'o lezada mii-an iha arguidu nia oin. Arguidu la konsege taa lezada, maibé arguidu lori katana nia belar baku lezada nia liman-fuan sorin parte loos rezulta bubu no moras. Depoide ida-ne'e, arguidu haruka lezada tama ba toba iha uma-laran no arguidu foti lezada ho nia oan sira nia roupa no sunu hotu iha kalan ne'e. Antes agresaun ne'e, arguidu deskonfia lezada iha relasaun ho mane seluk.

Aktu hirak-ne'e rezulta lezada sente moras iha matan-fukun, isin-loloon no liman fuan sorin parte loos inklui sente ta'uk maka'as to'o mii-an.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD no kontra artigu 157 KP kona-ba ameasa ho moldura penál to'o tinan 1 ka multa.

Produsaun ba prova sira

Iha julgamentu, arguidu rejeita ka'er katana no amesa atu taa lezada nia kabun, enkuantu faktu sira seluk, arguidu konfesa katak nia halo duni. Arguidu deklara mós katak nia halo agresaun sira ne'e tanba deskonfia lezada iha relasaun amante ho mane seluk.

Tribunál konfirma ba arguidu kona-ba lezada nia kondisaun iha loron julgamentu (05 Abril 2019) ne'ebé tribunál haree lezada sofre matan fukun kanek no metan iha hasan. Relasiona faktu ida-ne'e, arguidu deklara katak iha loron antes (04 Abril 2019) arguidu basa dala ida iha lezada nia hasan parte loos tanba lezada lakohi hamutuk ho arguidu mai tribunál. Enkuantu kona-ba kanek iha lezada nia matan fukun, akontese tanba baku kona iha kadeira bainhira lezada riba-an ba rai.

Lezada kontinua konfirma faktu sira iha akuzasaun no deklara katak lezada sempre fó hatene arguidu bainhira ba fatin ruma inklui iha loron akontesimentu. Lezada rejeita iha relasaun ho mane seluk no deklara katak arguidu mak iha relasaun amante ho feto seluk. Lezada hatutan katak iha 04 Abril 2019, maizumenus iha oras tuku 14:00 lokraik, arguidu hodi fatuk tuku iha lezada nia matan fukun no tebe lezada nia kanotak parte loos no sira nia oan mós asiste akontesimentu ne'e. Arguidu halo agresaun ne'e tanba husu osan US\$10.00 ba lezada atu ba joga maibé lezada la fó. Depoide akontesimentu ne'e, lezada sai husi uma no ba hela tiha iha lezada nia família.

Alegasaun finál

Prokuradór konsidera arguidu provadu komete faktu hotu iha akuzasaun no husu ba tribunál atu kondena arguidu ho pena prizaun fulan neen suspende ba tinan ida. Enkuantu defeza, husu ba tribunál atu aplika pena ne'ebé mak justu no adekuaudu ba arguidu.

Depoide alegasaun finál, tribunál pronúnsia alterasaun la substansiál katak lezada mak buka osan hodi sustenta família no osan hirak ne'e entrega ba arguidu. Aleinde ne'e, arguidu ema ne'ebé toman joga no iha loron ida antes mai julgamentu (04 Abril 2019) arguidu uza fatuk tuku lezada nia matan fukun.

Desizaun

Tribunál prova katak iha 04 Novembru 2016, arguidu ba hasoru lezada iha lezada nia tiun (JS) nia uma no tebe dala tolu iha lezada nia matan-fukun no rezulta lezada oin nakukun no monu tun kedas ba rai. Arguidu rasta lezada nia liman no dada sai lezada ba li'ur no iha kalan ne'e, sira fila kedas ba uma. Bainhira iha dalan fila ba uma, arguidu kontinua tebe dala barak iha lezada nia kabun mezmú lezada isin rua fulan ualu.

Tribunál prova katak maizumenus iha oras tuku 01:30 madrugada, arguidu ka'er katana ida no fanu lezada ne'ebé toba hela no haruka lezada sai ba li'ur. Arguidu haruka lezada hamriik ho

pozisaun hamrik-loos no arguidu ameasa atu taa fera lezada nia kabun hodi hasai bebe iha lezada nia kabun-laran. Tribunál mós prova lezada tauk no hako'ak metin nia kabun no halo lezada mii-an iha arguidu nia oin. Arguidu la konsege taa lezada, maibé arguidu lori katana nia belar no baku iha lezada nia liman-fuan sorin loos. Depoizde ne'e, arguidu haruka lezada ba toba no arguidu kontinua ba foti lezada no oan sira nia roupa no sunu hotu.

Aleinde ne'e, tribunál prova faktu foun ne'ebé akontese iha 04 Abril 2019 katak arguidu foti fatuk tuku iha lezada nia matan-fukun no tebe lezada nia kanotak parte loos.

Tribunál konklui prosesu ne'e no kondena arguidu ho pena prizaun tinan rua suspende ba tinan haat no aplika regra ba konduta atu arguidu apresenta-an periódikamente kada fulan dala rua durante tinan ida fulan neen ba iha tribunál. Tribunál mós kondena arguidu selu kustu judisiál US\$40.00.

6. Krime ofensa ba integridade fízika simples ho natureza violénsia doméstika

Nú. Prosesu : 0164/17. DIBCR
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Jonas Henrique da Costa
Desizaun : Pena prizaun fulan 3 suspende ba tinan 1

Iha 08 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JSP hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha 17 Agostu 2017, maizumenus iha oras tuku 23:00 kalan, arguidu kumu sira nia oan mane bo'ot ne'ebé sofre hela ulun moras. Lezada hateten ba arguidu atu fó de'it ai-moruk paracetamol ba sira nia oan ne'e atu nune'e bele di'ak lalais. Maibé arguidu hatan ba lezada katak "*ha'u hakarak kumu karik, ó manda ka?*". Hafoin, arguidu tolok lezada, lezada mós tolok fila-fali arguidu. Sira diskute malu no arguidu tuku dala tolu iha lezada nia ulun no dala ida iha hasan karuk. Arguidu nia hahalok ne'e halo lezada sente moras iha ulun, bubu no metan iha hasan karuk.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 husi LKVD.

Produsaun ba prova sira

Arguidu konfesa faktu sira iha akuzasaun no deklarata katak nia halo agresaun hasoru lezada ne'e tanba lezada riba odamatan, la'os tanba haruka fó ai-moruk ba sira nia oan. Arguidu dehan katak nia tuku lezada iha ulun ho intensaun atu halo lezada nonook maibé lezada la nonook, tanba ne'e arguidu tuku tan dala ida iha lezada nia hasan parte karuk.

Arguidu mós deklarata katak hafoin akontesimentu ne'e, polísia lori arguidu ba iha sela detensaun durante loron rua no bainhira fila arguidu husu deskulpa ba lezada no sira di'ak malu ona to'ó agora.

Entretantu lezada kontinua reforsa faktu hotu iha akuzasaun no konfirma mós ho arguidu nia deklarasaun katak sira di'ak malu ona no depoisde akontesimentu arguidu la baku ona lezada to'ó agora.

Alegasaun final

Prokuradór konsidera arguidu provadu komete krime tuir faktu sira iha akuzasaun, arguidu nia deklarasaun no depoimentu hosi lezada. Maibé maski sira di'ak malu ona, husu ba tribunál atu kondena arguidu ho pena multa US\$60.00 ne'ebé kada loron arguidu sei selu US\$0.50.

Enkuantu defeza, konsidera arguidu provadu komete krime sira iha akuzasaun maibé tanba arguidu konfesa ninia hahalok no di'ak malu ona ho lezada, tanba ne'e husu ba tribunál atu aplika pena admoestasaun ba arguidu maibé karik tribunál iha hanoin seluk husu atu aplika pena multa.

Desizaun

Tribunál konsidera arguidu provadu duni tuku dala tolu iha lezada nia ulun no dala ida iha hasan karuk. Arguidu nia hahalok ne'e halo lezada sente moras iha ulun inklui bubu no metan iha hasan karuk. Tribunál konklui prosesu ne'e no kondena arguidu ho pena prizaun fulan tolu suspende ba tinan ida no kondena arguidu selu kustu judisial US\$20.00.

7. Krime aktu seksuál ho adolexente

Nú. Prosesu	: 0005/17 DIMTN
Kompozisaun Tribunál	: Koletivu
Juis	: Dra. Maria Solana, Dr. António Helder V. do Carmo no Dr. Ivan Patrocínio Antonino Gonçalves
Prokuradór	: Dr. Hipolito Santa
Defeza	: Dr. Pedro Aparição (advogadu privadu)
Desizaun	: Pena prizaun tinan 2 suspende ba tinan 3 no indemnizasaun sivil US\$170.00

Iha 10 Abril 2019, Tribunál Distritál Dili prezide julgamentu leitura akordaun ba krime aktu seksuál ho adolexente ne'ebé envolve arguidu RS hasoru lezada RdS ho idade tinan 16, iha Distritu Dili.

Akuzasaun Prokuradór

Prokuradór akuza katak iha loron no fulan ne'ebé la apura maibé iha tinan 2016, lezada remata Eskola Pre-Sekundáriu no atu kontinua nia estudu iha Eskola Sekundáriu iha Dili. Arguidu ne'ebé nu'udar lezada nia viziñu ba hasoru lezada nia inan-aman atu hatama lezada iha Ensinu Sekundáriu iha Manatuto tanba arguidu hanorin iha ne'ebá. Arguidu mós haruka lezada ba hela ho arguidu nia tian ida ne'ebé hela mesak iha uma ida iha Manatuto.

Lezada tama duni iha Eskola Ensinu Sekundáriu iha Manatuto no bainhira lezada hahú eskola, arguidu haruka mensajen liuhusi *facebook* ba lezada. Iha arguidu nia mensajen ne'e arguidu hateten katak arguidu gosta lezada no hakarak namora ho lezada enkuantu arguidu rasik iha ona feen. Maibé, lezada lakohi ho razaun konsidera arguidu nu'udar nia profesór.

Iha 19 Abril 2017, arguidu tula lezada husi Manatuto mai Dili atu sosa lezada nia *catok* fuuk. Bainhira mai to'o iha Metinaru, arguidu para tiha motor no haruka lezada ba uluk iha uma ki'ik ida iha tasi ibun no arguidu mós tuir lezada ba iha uma ki'ik ne'e. Iha ne'ebá arguidu ka'er lezada nia susun rua no kolu lezada nia roupa. Lezada tenta atu hakilar maibé la konsege tanba lezada ta'uk arguidu hasai nia husi eskola. Arguidu halo duni relasaun seksuál ho lezada no depoisde remata arguidu tula lezada mai Dili no sosa lezada nia *catok* fuuk.

Iha loron ne'ebé lezada la lembra maibé iha Maiu 2017, iha oras tuku 18:00 lokraik, arguidu tula lezada ba iha ema ida ne'ebé hatene aimoruk tradisionál tanba lezada sofre moras ran mutin. Arguidu la tula ba iha ema ne'e maibé tula fali lezada ba iha ai-laran tuan iha parte Manatuto nian no lamas lezada nia orgaun seksuál no kontinua halo relasaun seksuál ho lezada.

Iha loron tuir mai iha fulan no tinan hanesan, iha tuku 16:00 lokraik, arguidu tula lezada ba hola modo maibé bainhira fila, arguidu lori lezada ba ai-laran no halo tan relasaun seksuál ho lezada. Lezada la hakilar no la hateten sai arguidu nia hahalok ba ema seluk tanba ta'uk arguidu hasai lezada husi eskola. Arguidu mós promete katak nia sei husik nia feen hodi hola lezada, maibé arguidu nunka realiza nia promessa ne'e.

Prokuradór akuza arguidu kontra artigu 172 (1) KP kona-ba krime violasaun seksuál ho moldura penál husi tinan 5 to'o tinan 15 prizaun no artigu 173 (d) kona-ba agravasaun.

Produsaun ba prova sira

Iha julgamentu, arguidu deklara faktu balun la loos, liuliu kona-ba obriga lezada no halo relasaun seksuál dala barak. Arguidu konfesa katak nia iha duni relasaun namora ho lezada durante tinan ida resin no arguidu la obriga lezada bainhira halo relasaun seksuál. Lezada mós hakarak halo relasaun seksuál ne'e tanba antes halo relasaun seksuál, arguidu sempre mensajen ba lezada

liuhusi *facebook* hodi husu ba lezada. Arguidu mós konfirma faktu ne'ebé akontese iha 19 Abril 2017, maibé arguidu rejeita faktu sira seluk kona-ba relasaun seksuál ne'ebé akontese.

Enkuantu lezada kontinua konfirma faktu sira iha akuzasaun no deklarata katak bainhira atu halo relasaun seksuál, arguidu sempre mensajen ba lezada liuhusi *facebook*. Lezada deklarata katak iha momentu ne'ebá nia ho idade tinan 16 no arguidu promete atu hola lezada maibé arguidu nunka realiza nia promesa. Lezada deklarata tan katak, la'os lezada mak keixa arguidu maibé lezada nia maun sira mak hato'o keixa tanba haree arguidu nia mensajen iha lezada nia telemóvel.

Alegasaun final

Prokuradór husu ba tribunál atu halo alterasaun kualifikasaun jurídika husi krime violasaun seksuál ho agravaasaun (d) ba fali aktu seksuál ho adolexente tuir artigu 178 KP tanba arguidu abuzo lezada nia inexperiensia. Maski arguidu la obriga, maibé arguidu halo relasaun seksuál ho lezada mezmua hatene hela katak lezada fo'in tinan 16 no seidauk iha esperiénsia. Tanba ne'e, husu ba tribunál atu kondena arguidu ho pena tuir moldura penál iha krime ida ne'e.

Entretantu defeza husu ba tribunál atu tetu no konsidera deklarasaun arguidu no lezada ni'an tanba iha kazu ne'e maski lezada hatene hela arguidu iha feen maibé lezada konsiente atu halo relasaun seksuál ho arguidu. Lezada rasik mós konfirma katak bainhira arguidu atu halo relasaun seksuál arguidu mensajen uluk ba lezada liuhusi *facebook*. Ho faktu no sirkunstánsia sira ne'e hotu, husu ba tribunál atu absolve arguidu hosi krime ne'e.

Hafoin tetu pedidu husi prokuradór, tribunál halo kedan alterasaun ba kualifikasaun jurídika husi violasaun seksuál ho agravaasaun ba fali krime aktu seksuál adolexente tuir artigu 178 husi KP no fó prazu lora 10 ba prokuradór no defeza hodi fó sira nia pozisaun prosesual ba alterasaun ne'e, maibé parte rua ne'e deside presinde ba prazu.

Desizaun

Hafoin rona no tetu faktu sira hotu, tribunál konsidera arguidu provadu komete krime aktu seksuál ho adolexente tuir faktu sira iha akuzasaun tanba maske arguidu hatene hela lezada tinan 16 no laiha esperiénsia maibé arguidu kontinua halo relasaun seksuál ho lezada.

Bazeia ba prova sira ne'e, tribunál konklui prosesu ne'e no kondena arguidu ho pena prizaun tinan rua suspende ba tinan tolu no selu indemnizasaun sivil US\$170.00 ba lezada. Tribunál mós kondena arguidu selu kustu judisial US\$20.00.

8. Krime ofensa ba integridade física simples natureza violência doméstica

Nú. Prosesu : 0583/17.DICMR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Nelson de Carvalho

Defeza : Dr. Germano Guterres Ramos
Desizaun : Pena multa US\$120.00

Iha 10 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu OA hasoru nia feen, iha Distritu Dili.

Akuzasaun Prokuradór

Prokuradór akuza katak iha 02 Dezembru 2017, tuku 19:30 kalan, arguidu lori liman tuku dala ida iha lezada nia matan-fukun parte loos, tuku dala rua iha lezada nia inus no tuku dala rua iha lezada nia hasan parte karuk. Arguidu duun lezada katak lezada iha relasaun amante ho mane seluk. Maske lezada rejenta katak nia nunka la'o ho mane seluk maibé arguidu kontinua duun lezada iha amante. Arguidu nia hahalok ne'e rezulta lezada sofre inus kanek no ran, no moras iha hasan parte karuk no matan fukun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklarata katak nia komete krime hasoru lezada la'os tanba deskonfia lezada ho mane seluk maibé tanba lezada kontinua fa'an sate iha eskola mezmu sira nia oan mesak iha uma.

Iha parte seluk, lezada kontinua konfirma faktu sira iha akuzasaun no deklarata katak nia hakarak fa'an sate tanba baruk iha uma. Maibé depoisde akontesimentu ne'e, lezada iha uma ona hodi tau matan ba sira nia oan.

Alegasaun finál

Prokuradór konsidera arguidu provadu komete krime tuir faktu sira iha akuzasaun tanba de'it deskonfia ne'ebé laiha prova. Bazeia ba arguidu nia konfisaun no lezada nia deklarasaun, prokuradór konsidera presiza tebes mekanismu prevensaun espesial ba arguidu atu la repete ninia hahalok ne'e iha futuru. Liuliu tanba arguidu sei kontinua moris hamutuk ho lezada. Tanba ne'e, husu ba tribunál atu aplika pena ne'ebé adekuadu liu ba arguidu.

Enkuantu parte defeza, husu ba tribunál atu konsidera arguidu nia konfisaun no arguidu nu'udar ema ne'ebé responsavel prinsipál ba sira nia família. Tanba ne'e, husu ba tribunál atu kondena arguidu ho pena ne'ebé justu.

Desizaun

Tribunál konsidera arguidu provadu komete krime tuir faktu sira iha akuzasaun katak arguidu lori liman tuku dala ida iha lezada nia matan-fukun parte loos, tuku dala rua iha lezada nia inus rezulta kanek no ran no tuku dala rua iha lezada nia hasan parte karuk rezulta bubu. Bazeia ba prova sira ne'e, tribunál konklui prosesu ne'e no kondena arguidu ho pena multa US\$120.00.

9. Krime ofensa ba integridade física simples ho natureza violência doméstica

Nú. Prosesu : 0060/17.LILIQ
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Bartolomeu de Araújo
Defeza : Dr. Nelson Borges (defensór estajiáriu)
Desizaun : Pena prizaun fulan 6 suspende ba tinan 1

Iha 10 Abril 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu GdS hasoru nia feen, iha Distritu Likisá.

Akuzasaun Prokuradór

Prokuradór akuza katak iha 10 Agostu 2017, iha oras tuku 21:00 kalan, arguidu tama ba kuartu laran, tuku dala barak iha lezada nia ulun no ibun no uza kapasete baku dala ida iha lezada ninia ulun. Arguidu ka'er lezada nia fuuk rasta husi kama leten tun ba rai no sama lezada ninia hirus-matan dala tolu. Aktu ne'e rezulta lezada ba halo tratamentu iha Ospital Likisá no iha relatóriu médiku ba kanek sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu mós deklara katak nia mak responsavel hodi sustenta nia família.

Hafoin rona arguidu, tribunál presinde atu la rona lezada nia deklarasaun tanba arguidu konfesa integralmente faktu sira iha akuzasaun prokuradór nian.

Alegasaun final

Prokuradór konsidera arguidu provadu komete krime tuir faktu sira iha akuzasaun tanba arguidu konfesa integralmente. Aleinde ne'e, prokuradór mós konsidera arguidu nia arrependimentu ne'ebé to'o agora la baku ona lezada. Mezmu nune'e, presiza tebes prevensaun espesial ida ba arguidu atu arguidu la repete tan ninia hahalok iha futuru. Tanba ne'e, husu ba tribunál atu kondena arguidu ho pena prizaun maibe suspende ninia ezekusaun.

Enkuantu defeza, husu ba tribunál atu kondena arguidu ho pena multa ho konsiderasaun ba sirkunstánsia ne'ebé hakmaan arguidu nia pena hanesan arguidu konfesa no arrepende ninia hahalok.

Desizaun

Depoisde avalia faktu sira hotu, tribunál prova katak arguidu tuku dala barak duni iha lezada nia ulun no ibun rezulta kanek no moras, lori kapasete baku dala ida iha lezada ninia ulun no rasta lezada ninia fuuk husi kama leten tun ba rai. Tribunál mós prova katak arguidu sama lezada ninia hirus-matan dala tolu no rezulta kanek iha ibun no prova mós ho relatóriu médiku. Bazeia ba prova hirak ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

10. Krime ofensa ba integridade fízika simples ho natureza violénsia doméstika

Nú. Prosesu : 0020/18.ALRMX
Kompozisaun Tribunál : Singulár
Juis : Dra. Edite Palmira dos Reis
Prokuradór : Dr. Nelson de Carvalho
Defeza : Dr. Anselmos Pinto
Desizaun : Pena prizaun fulan 5 suspende ba tinan 1

Iha 11 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DRS hasoru nia feen, iha Distritu Aileu.

Akuzasaun Prokuradór

Prokuradór akuza katak iha 27 Outubru 2018, tuku 18:00 lokraik, arguidu no lezada ba iha sede aldeia nian hodi asiste prosesu rezolve problema ne'ebé envolve sira nia família. Depoisde rezolve hotu, lezada fila uluk ba uma maibé hein arguidu la fila, nune'e lezada deside ba filafali iha sede aldeia ne'e. Iha ne'ebá lezada haree arguidu hemu hela tua ho arguidu nia kolega sira. Lezada ko'alia barak hasoru arguidu, hafoin arguidu hamriik no hamutuk ho lezada fila ba uma. Bainhira to'o uma, lezada kontinua ko'alia sobre arguidu hemu tua ne'e, no arguidu tebe dala ida iha lezada nia ulun parte karuk no basa dala rua iha lezada nia kabaas parte loos. Aktu ne'e rezulta lezada sente moras no bubu iha ulun parte karuk no moras iha kabaas parte loos no karuk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak iha momentu ne'ebá, arguidu ho nia nia kolega sira hemu tua hamutuk. Lezada ba bolu arguidu no ko'alia barak tanba toman arguidu hemu tua. Bainhira fila ba uma, lezada tuur iha kadeira no kontinua ko'alia barak, nune'e arguidu tebe dala ida ba lezada nia ulun halo lezada sente moras maka'as iha ulun. Depoizde liu tiha loron ida, arguidu lori lezada ba ospital hodi halo tratamentu tanba lezada kontinua sente moras iha ulun. Arguidu deklarata katak nia arrepende ba nia hahalok ne'e.

Lezada mos kontinua konfirma faktu sira iha akuzasaun no deklarata katak lezada hirus arguidu tanba loron besik kalan ona maibe arguidu seidauk fila uma nune'e lezada ba bolu arguidu. Maibe bainhira to'o iha sede aldeia, lezada haree arguidu hemu hela tua. Bainhira haree arguidu hemu tua, lezada aumenta hirus tanba preokupa ho arguidu nia saude.

Alegasaun final

Prokurador konsidera arguidu provadu komete faktu sira iha akuzasaun tanba arguidu konfesa no konfirma liutan hosi lezada. Tanba ne'e, husu ba tribunál atu fo pena ne'ebé justu ba arguidu. Nune'e mos defeza konkorda ho pedidu prokurador nian no husu ba tribunál atu kondena arguidu ho pena ne'ebé justu tanba arguidu konfesa no arrepende ona ninia hahalok.

Desizaun

Depoizde avalia faktu sira ne'ebé prodús iha julgamentu, tribunál konsidera arguidu provadu komete faktu sira iha akuzasaun. Arguidu provadu tebe dala ida iha lezada nia ulun parte karuk no basa dala rua iha lezada nia kabaas parte loos. Bazeia ba prova sira ne'e, tribunál konklui prosesu ne'e no kondena arguidu ho pena prizaun fulan lima suspende ba tinan ida no selu kustu judisial US\$10.00.

11. Krime ofensa ba integridade fizika simples natureza violensia domestika

Nú. Prosesu	: 0166/18. DICMR
Kompozisaun Tribunál	: Singulár
Juis	: Dra. Albertina da Conceição das Neves
Prokurador	: Dr. Nelson de Carvailho
Defeza	: Dr. Miquel Faria (advogadu privadu)
Desizaun	: Pena prizaun tinan 2 suspende ba tinan 2

Iha 12 Abril 2019, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violensia domestika ne'ebé envolve arguidu CFP hasoru nia feen, iha Distritu Dili.

Akuzasaun Prokurador

Prokurador akuza katak iha data ne'ebé la apura, maibe iha tinan 2018, oras tuku 14:00 lokraik, arguidu hein hela sira nia oan ne'ebé sei bebe maibe tanba sira nia oan ne'e tanis, nune'e arguidu

haruka sira nia oan mane primeiru ne'ebé foin tinan tolu ba bolu lezada iha viziñu nia uma. Bainhira la'õ ba bolu nia inan, sira nia oan ne'e monu, nune'e arguidu lori fatuk tuda lezada nia ulun rezulta kanek no ran. Tanba ne'e, lezada tenke ba halo tratamentu iha Ospital Nasional Guido Valadares, Bidau.

Prokurador akuza arguidu kontra artigu 145 KP kona-ba ofensa ba integridade fizika simples moldura penal to'õ tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak arrepende ninia hahalok ne'e. Arguidu rekoñese katak ninia hahalok ne'e halo lezada sente moras. Arguidu mós deklarata katak di'ak malu ona ho lezada no kontinua moris hamutuk hanesan feen ho la'en.

Lezada konfirma faktu sira iha akuzasaun no deklarata katak arguidu tuda lezada tanba sira nia oan monu. Lezada hatutan katak nia ulun tau ligadura no liu tiha loron tolu mak foin loke ligadura ne'e. Lezada mós reforsa deklarasaun arguidu nian katak sira di'ak malu ona no nafatin moris hanesan feen ho la'en.

Alegasaun final

Prokurador haktuir katak arguidu konfesa faktu sira iha akuzasaun. Tanba ne'e, konsidera katak krime ne'e akontese duni. Maibé tanba arguidu deklarata katak nia arrepende ona ninia hahalok no nafatin moris hamutuk hanesan feen ho la'en, husu ba tribunál atu aplika pena admoestasaun.

Defeza konkorda ho pena admoestasaun tuir pedidu prokurador nian tanba konsidera arguidu konfesa ninia hahalok no foin primeiravés hatan iha tribunál.

Desizaun

Depoiz de avalia faktu sira ne'ebé prodús iha julgamentu, tribunál konsidera katak faktu sira iha akuzasaun prokurador nian provadu duni katak arguidu lori fatuk tuda lezada nia ulun rezulta kanek no ran. Bazeia ba faktu provadu ne'e, tribunál kondena arguidu ho pena prizaun tinan rua suspende ba tinan rua.

12. Krime ofensa ba integridade fizika simples ho natureza violénsia doméstika

Nú. Prosesu	: 0212/18.ERHAT
Kompozisaun Tribunál	: Singulár
Juis	: Dr. Eusébio Xavier Victor
Prokurador	: Dr. Osorio de Deus
Defeza	: Dra. Marcia Sarmiento
Desizaun	: Pena prizaun fulan 6 suspende ba tinan 1

Iha 12 Abril 2019, Tribunál Distritál Dili, liuhusi tribunál movel iha Distritu Ermera prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JP hasoru nia feen, iha Distritu Ermera.

Akuzasaun Prokuradór

Prokuradór akuza katak iha tinan 2016, arguidu husik hela lezada ho sira nia oan na'in tolu no hola fali feto seluk iha Distritu Baukau. Lezada no sira nia oan sira ba hela tiha iha lezada nia família. Mezmu nune'e, arguidu sempre ba mai entre feen ki'ik no lezada. Iha 02 Setembru 2018, iha oras tuku 15:00 lokraik, arguidu ho kondisaun lanu hateten ba lezada katak nia hakarak lori sira nia oan na'in tolu ba hela ho arguidu ho nia feen ki'ik iha Baukau. Maibé lezada rejenta arguidu nia pedidu ne'e, nune'e arguidu tuku dala rua iha lezada nia kotuk-laran no tuku dala ida iha lezada nia ibun rezulta bubu no moras iha kotuk-laran. Momentu ne'ebá lezada ho nia oan sira mesak iha uma tanba lezada nia inan-aman sai hotu ba partisipa seremónia kultura nian.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu rejenta faktu balun katak arguidu la tuku lezada nia kotuk-laran no la tuku lezada nia ibun, maibé basa dala ida iha lezada nia hasan parte karuk tanba lezada so'e sira nian oan na'in tolu nia roupa. Arguidu konfesa katak nia hola ona feto ki'ik maibé nia nafatin tau matan ba lezada ho sira nia oan sira tanba arguidu hela ba mai.

Enkuantu lezada kontinua konfirma faktu hotu iha akuzasaun katak arguidu tuku dala rua iha lezada nia kotuk-laran no tuku dala ida iha ibun. Mezmu nune'e, lezada perdua ona arguidu no kontinua moris hamutuk hanesan feen ho la'en mezmu arguidu hola ona feto seluk.

Alegasaun finál

Prokuradór konsidera arguidu provadu komete krime tuir faktu sira iha akuzasaun maski arguidu nega faktu balun katak basa de'it lezada maibé lezada mantein faktu sira iha akuzasaun. Maski lezada perdua no di'ak malu ona ho arguidu, maibé presiza halo prevensaun jerál no espesiál ba arguidu, atu nune'e evita arguidu repete nia hahalok hasoru lezada nomós arguidu nia feen ki'ik. Tanba ne'e, husu ba tribunál atu aplika pena prizaun tinan ida suspende ba tinan ida.

Enkuantu defeza husu ba tribunál atu kondena arguidu ho pena ne'ebé justu ho konsiderasaun ba sirkunstánsia atenuante sira hanesan arguidu kolabora di'ak ho tribunál, arrepende ninia hahalok, foin mai hatan iha tribunál no kontinua sustenta lezada ho sira nia oan mezmu iha ona feen ki'ik.

Desizaun

Depoizde avalia faktu sira hotu, tribunál konsidera arguidu provadu tuku dala rua iha lezada nia kotuk laran no tuku dala ida iha lezada nia ibun. Bazeia ba prova sira ne'e, tribunál konklui prosesu ne'e no kondena arguidu pena prizaun fulan neen suspende ba tinan ida.

13. Krime ofensa ba integridade fízika simples natureza violénsia doméstika

Nú. Prosesu : 0619/17.DICMR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Nelson de Carvalho
Defeza : Dr. Jose da Silva
Desizaun : Pena multa US\$60.00

Iha 12 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SM (membro UPF-FFDTL) hasoru nia feen, iha Distritu Dili.

Akuzasaun Prokuradór

Prokuradór akuza katak lezada deskonfia ona arguidu iha relasaun amante ho fetu seluk tanba lezada haree liuhusi *facebook*. Lezada mós hatene katak iha 23 Novembru 2017, arguidu ho nia amante sei tun mai Dili husi Maliana. Iha loron refere, iha oras tuku 14:00 lokraik, lezada ba hein ona arguidu no nia amante iha terminál Tasitolu. Bainhira arguidu ho ninia amante tun husi bis-Maliana, lezada hakat kedas ba arguidu no husu ba arguidu "*feto ki'ik mak ne'e ka?*" no arguidu hatan katak "*la'os ida, ó koñese sala*". Lezada hatudu fotografia ba arguidu no hakbesik-an ba fetu ki'ik ne'e hodi dehan, "*ó mak tuir ha'u nia la'en ba iha postu Tapo, nia ha'u nia la'en, iha ona oan rua, ami hela iha Metinaro no jaket (jaketa) ne'ebé ó tau ne'e hau nia katuas-oan nian.*"

Haree katak lezada husu litik fetu ki'ik ne'e, arguidu ka'er metin tiha lezada ninia kakorok no basa dala ida iha lezada nia ulun. Arguidu rakut lezada ninia liman sorin loos no tuku dala ida iha ulun, tebe dala ida iha lezada ninia kelen sorin loos. Agresaun ne'e halo lezada sente moras iha kakorok, ulun ho liman-kabun.

Prokuradór akuza arguidu kontra artigu 145 KP kona-ba ofensa ba integridade fízika simples moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa katak nia ka'er metin duni lezada ninia kakorok, basa lezada nia ulun, rakut liman no tebe kelen sorin loos. Mezmu nune'e, arguidu deklara katak arrepende ninia hahalok no promete sei la baku tan lezada. Arguidu hatutan katak sira nafatin moris hamutuk hanesan feen ho la'en no to'o agora laiha ona problema entre lezada no arguidu.

Aleinde ne'e, lezada kontinua konfirma faktu sira iha akuzasaun no reforsa deklarasaun arguidu nian katak to'o agora arguidu la baku ona lezada.

Alegasaun final

Prokurador haktuir katak arguidu konfesa hotu faktu sira iha akuzasaun, rekoñese nia halo agresan hasoru lezada tanba de'it lezada husu tuir ba feto ki'ik kona-ba relasaun ho arguidu. Aleinde ne'e, arguidu mos arrepende ninia hahalok no promete la baku tan lezada. Tanba ne'e konsidera krime ne'e akontese duni no husu ba tribunál atu aplika admoestasaun.

Defeza konkorda ho pedidu prokurador nian atu kondena arguidu ho pena admoestasaun, tanba konsidera sirkunstansia atenuante sira hanesan arguidu konfesa faktu hotu, arrepende ninia hahalok, la repete ona ninia hahalok no foin primeiravés hatan iha tribunál.

Desizaun

Tribunál prova katak arguidu ka'er metin duni lezada ninia kakorok no basa dala ida iha lezada nia ulun. Arguidu rakut lezada ninia liman sorin loos no tuku dala ida iha ulun, tebe dala ida iha lezada ninia kelen sorin loos. Tribunál prova katak agresan ne'e halo lezada sente moras iha kakorok, ulun ho liman-kabun.

Bazeia ba faktu provadu hirak ne'e, tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$0.50 kada lora durante lora 120. Bainhira arguidu la selu pena multa ne'e, arguidu sei kumpri iha prizaun durante lora 80 nu'udar pena alternativu.

14. Krime ofensa ba integridade física simples natureza violência doméstica

Nú. Prosesu	: 0002/17.ALSIC
Kompozisaun Tribunál	: Singulár
Juis	: Dra. Ana Paula Fonseca
Prokurador	: Dr. Nelson de Carvalho
Defeza	: Dr. Jose da Silva
Desizaun	: Pena multa US\$420.00

Iha 12 Abril 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FdC hasoru nia feen ki'ik, iha Distritu Aileu.

Akuzasaun Prokurador

Prokuradór akuza katak iha 07 Feveireiru 2019, iha oras tuku 19:00 kalan, lezada fila husi viziñu nia uma no arguidu basa dala tolu iha lezada ninia hasan loos no karuk. Arguidu mós tuku dala ida iha ibun halo lezada oin nakukun no monu ba kama leten. Arguidu kontinua tuku tan dala ida iha lezada nia liman. Aktu hirak ne'e, rezulta lezada sente moras iha hasan no ran sai husi ibun. Lezada mós ba halo tratamentu saúde iha Sentru Saúde Aileu. Lezada nu'udar arguidu nia feen ki'ik no moris hanesan feen ho la'en desde tinan 2016 maibé la hela hamutuk. Arguidu hela ho ninia feen-boot no lezada mesak hela iha ninia uma.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak nia basa duni lezada dala rua iha hasan sorin loos ho karuk no momentu basa ne'e arguidu nia kadeli kona iha lezada nia ibun halo ibun ran no rejenta faktu kona-ba tuku dala tolu iha hasan no ibun no liman. Maski nune'e, arguidu arrepende ninia hahalok tanba konsiente katak ninia hahalok ne'e la di'ak. Arguidu promete ba tribunál katak sei la komete tan hahalok refere hasoru lezada no ema seluk iha futuru.

Lezada konfirma katak arguidu basa dala rua iha hasan sorin loos ho karuk to'o lezada desmaia no monu kedas ba kama leten. Entretantu kona-ba tuku liman, lezada dehan la tuku. Kona-ba ibun ran, lezada deklara katak arguidu nia kadeli mak kona. Lezada mós deklara katak depoisde akontesimentu, sira nafatin moris hamutuk hanesan feen ho la'en no laiha tan ona problema mezmú arguidu ho lezada hela ketak-ketak.

Alegasaun finál

Prokurador argumenta katak arguidu komete krime hasoru lezada hanesan basa hasan halo lezada desmaia no monu ba kama leten. Lezada mós sofre ibun ran tanba arguidu ninia kadeli mak kona. Mezmú iha julgamentu arguidu nega faktu no konfirma mós ho lezada ninia deklarasaun katak arguidu la tuku maibé basa deit, nune'e, husu ba tribunál atu aplika pena justu ho adekuadu.

Enkuantu defeza husu ba tribunál atu aplika pena admoestasaun tanba arguidu foin primeiravés komete aktu violénsia hasoru lezada, arrepende ona ninia hahalok no kontinua moris hamutuk ho lezada nu'udar feen ho la'en maski sira la hela iha uma ida.

Desizaun

Tribunál prova katak arguidu basa duni lezada ninia hasan dala rua halo lezada desmaia no monu ba kama letan. Tribunál prova katak lezada sofre ibun ran tanba kona arguidu nia kadeli. Entretantu tribunál la prova arguidu basa dala tolu no tuku lezada nia ibun no liman. Bazeia ba faktu prova sira ne'e, tribunál kondena arguidu ho pena multa US\$ 480.00 ne'ebé arguidu sei

selu gradualmente kada loron US\$4.00 durante loron 120. Bainhira arguidu la selu pena multa ne'e, arguidu selu kumpri iha prizaun durante loron 80 nu'udar pena alternativu ida ba arguidu. Tribunál mós kondena arguidu kustu judisiál US\$20.00.

15. Krime violasaun seksuál

Nú. Prosesu : 0143/18.ERERM
Kompozisaun Tribunál : Koletivu
Juis : Dra. Ana Paula Fonseca, Dra. Zulmira A. Barros da Silva no Dr. Eusébio Xavier Victor
Prokuradór : Dr. Osório de Deus
Defeza : Dra. Marcia Sarmento
Desizaun : Absolve

Iha 15 Abril 2019, Tribunál Distritál Dili prezide julgamentu leitura akordaun ba krime violasaun seksuál ne'ebé envolve arguidu AdC hasoru lezada AdS hanesan komadre ho kompadre, iha Distritu Ermera.

Akuzasaun Prokuradór

Prokuradór akuza iha 02 Feveireiru 2018, iha oras tuku 09:00 dadeer, lezada kuu modo tahan iha to'os ho distansia kuaze metru 100 husi lezada nia uma. Iha dalan klaran, bainhira lezada la'o atu fila ba uma arguidu bolu lezada dehan "*hamrik lai ita dada lia lai*". Lezada mós para no arguidu haruka lezada tur tun ba rai no arguidu hatun tiha lezada ninia bote hodi tau iha rai. La ko'alia buat ruma, arguidu haruka lezada toba iha rai no komesa loke lezada ninia kalsa, arguidu rei lezada nia hasan, kaer lezada ninia susun no halo relasaun seksuál ho lezada.

Depois halo tiha relasaun seksuál arguidu ka'er rai no marka tiha ba iha lezada nia reen-toos dala rua no amesa lezada katak "*ó labele hatete sai saida mak ita halo ona, se ó hatete sai ha'u taa mate kedas ó, rai ne'e mós lulik*". Aleinde ne'e, arguidu mós amesa sei taa mate lezada ninia la'en ho arguidu ninia feen kuandu lezada konta sai ba sira. Arguidu mós dehan ba lezada katak komarka ne'e la'os sulan animál. Tanba amesa ne'e, halo lezada sente ta'uk la konta sai ba nia la'en ka ema seluk.

Iha 04 Maiu 2018, oras la apuradu maibé iha dadersan, arguidu ninia feen rona arguidu bolu lezada iha kafe laran besik sira nia uma. Arguidu ninia feen komesa deskonfia arguidu amante ho lezada no telefone kedas ba iha lezada ninia oan fetu boot (CX) no dehan katak "*ha'u atu konta sai buat ruma mós ó lalika konta tuir ba ó ninia aman, ha'u sei hein de'it labarik iha ó ninia inan ninia isin ne'e mak moris hanesan ha'u ninia katuas-oan, ne'e ita bele halo ona problema*". Depois rona tiha informasaun ne'e, CX hateten sai ba ninia apa kona-ba informasaun ne'e. Hafoin lezada ninia la'en bolu lezada hodi husu tuir kona-ba saida mak nia rona. Lezada

rekoñese kona-ba relasaun seksuál ne'ebé akontese ona inklui fó hatene ba nia la'en kona-ba ameasa ne'ebé arguidu halo hasoru nia.

Depoisde ida-ne'e lezada ninia la'en haruka lezada atu ba hato'o keixa ba polisia. Bainhira arguidu ho lezada halo relasaun ne'e lezada isin rua ona maibé la hatene isin rua fulan hira. Bainhira arguidu rona lezada ba hato'o ona keixa iha polisia, arguidu foin lori karau ida no osan US\$ 100.00 atu fó ba lezada hodi taka tiha kazu ne'e.

Antes ne'e, la apura loron, fulan no tinan, arguidu ba iha lezada ninia uma ho intensaun atu haree lezada ninia la'en ne'ebé moras hela. Iha momentu ne'ebá arguidu ka'er lezada ninia liman no hatete ba lezada katak *"kuandu ha'u ka'er ona fetu nia liman, fetu ne'e maus deit ona (nonok deit)"*.

Prokurador akuza arguidu kontra artigu 172 KP kona-ba violasaun seksuál ho moldura penál husi tinan 5 to'o 15 prizaun.

Produsaun ba prova sira

Iha prosesu julgamentu, arguidu deklarara katak faktu balun loos no balun la loos katak iha 02 Feveiru 2017, sira halo duni relasaun seksuál iha to'os-laran ho konsentimentu. Sira mós konkorda hamutuk atu la konta sai ba idak-idak nia kónjuje liuhusi kaer rai halo juramentu katak se konta sai, rai ne'e sei han sira. Arguidu kontinua deklarara katak relasaun seksuál mós akontese mós iha 08 Feveiru 2017, iha oras tuku 20:00 kalan iha momentu arguidu ninia feen toba dukur ona, lezada mai bolu arguidu atu ba ninia uma. Iha ne'ebá sira halo relasaun seksuál tanba lezada nia la'en laiha uma. Arguidu hatutan katak iha tinan 1999, arguidu no lezada iha relasaun namora. Entretantu kona-ba faktu seluk ne'ebé akontese iha 02 Feveiru 2018 katak kaer lezada nia liman arguidu rekoñese maibé rejeita katak la hatete liafuan ida ba lezada.

Arguidu mós dehan katak lezada konta sai ba nia la'en no ba keixa tanba arguidu lakohi ona halo relasaun seksuál ho lezada. Aleinde ne'e, arguidu ninia feen foin hatene bainhira polisia ba kaptura arguidu.

Entretantu lezada konfirma faktu sira iha akuzasaun no deklarara katak arguidu sempre ameasa lezada atu labele konta sai ba ema seluk. Lezada rejeita deklarasaun arguidu nian katak uluk sira iha relasaun namora. Lezada hatutan katak antes sira halo relasaun seksuál, lezada isin rua fulan rua ona. Lezada konfirma deklarasaun arguidu nian katak arguidu lori karau ida no osan US\$100.00 bainhira rona lezada hato'o ona keixa. Arguidu lori karau no osan ne'e ho intensaun atu lezada taka tiha kazu ne'e. Maibé lezada lakohi simu no hakarak atu kontinua prosesa kazu ne'e.

Alegasaun final

Prokuradór argumenta katak arguidu nega faktu sira no deklara katak relasaun seksuál ne'e akontese dala tolu ho konsentimentu no sira halo juramentu atu la konta sai ba ema seluk. Aleinde ne'e, lezada deklara katak relasaun seksuál ne'e akontese dala tolu no akontese ho meiu ameasa atu lezada la bele konta sai ba ema seluk. Tetu ba faktu sira ne'e, husu ba tribunál atu kondena arguidu tuir konviksaun tribunál ninia.

Enkuantu defeza husu ba tribunál atu absolve arguidu husi akuzasaun prokuradór nian ho konsiderasaun arguidu ninia hahalok ne'e la prenze krime violasaun seksuál tanba relasaun seksual ne'e akontese tanba konsentimentu husi parte rua.

Desizaun

Depoide avalia faktu hotu, tribunál prova arguidu no lezada iha relasaun hanesan komadre ho kompadre. Tribunál prova katak relasaun seksuál dala tolu entre arguidu no lezada, sira halo ho konsentimentu. Bazeia ba faktu sira ne'e, tribunál absolve arguidu husi krime ne'e.

16. Krime ofensa ba integridade fízika simples ho natureza violénsia doméstika

Nú. Prosesu	: 0017/17.PDDIL
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Pedro Baptista
Defeza	: Dr. Emilio de Jesus Pereira (advogadu estajiáriu)
Desizaun	: Pena prizaun fulan 3 suspende ba tinan 1

Iha 15 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MG hasoru nia feen, iha Distritu Dili.

Akuzasaun prokuradór

Prokuradór akuza katak iha 13 Agostu 2015, arguidu ba iha nia feen ki'ik nia uma ho objetivu atu haree sira nia oan. Bainhira arguidu atu ko'us sira nia oan ne'e, lezada bandu tanba arguidu iha fali tan feto seluk no nunca vizita lezada ho sira nia oan. Arguidu no lezada diskute malu no arguidu tuku dala ida ba lezada nia hasan sorin karuk rezulta mean, bubu no moras.

Antes ne'e, arguidu ho lezada iha relasaun namora desde Setembru 2014 no ikus lezada isin rua no hahoris bebe ida iha Juñu 2015. Maibé arguidu la bele hola lezada tanba arguidu iha feen bo'ot. Depoide lezada hahoris tiha, arguidu ladún ba haree lezada no sira nia oan ne'e inklui ladún fó osan ba lezada. Iha Agostu 2015, lezada simu telefone husi feto ida ne'ebé hateten ba lezada katak nia mak namora ho arguidu. Hafoin ida-ne'e, lezada rona husi família katak arguidu nia feen mate ona no arguidu hola ona feto seluk.

Prokuradór akuza arguidu kontra artigu 145 husi KP ba ofensa integridade fízika simples ho moldura penál to' o tinan 3 prizaun ka multa, konjuga ho artigu 2, 3(a), 35(b) no 36 husi LKVD.

Produsaun ba prova sira

Iha julgamentu, arguidu uza nia direitu nonook. Entretantu lezada kontinua konfirma ba faktu sira iha akuzasaun no deklara katak desde lezada partu, arguidu nunca tau matan ba lezada ho sira nia oan no pior liu mak arguidu haruka feto seluk mensajen no telefone hodi tarata lezada.

Alegasaun final

Prokuradór konsidera arguidu provadu komete krime tuir faktu sira iha akuzasaun. Mezmu arguidu uza direitu nonook maibé lezada konfirma faktu sira no antes ne'e iha prosesu investigasaun perante ministériu públiku, arguidu konfesa ninia hahalok. Tetu ba faktu hirak ne'e hotu, husu ba tribunál atu kondena arguidu ho pena multa US\$100.00 ne'ebé arguidu sei selu durante loraun 100.

Entretantu defeza deklara katak arguidu uza nia direitu nonook. Maski lezada konfirma faktu sira iha akuzasaun maibé konsidera krime ne'e akontese tanba iha provokasaun husi lezada ne'ebé bandu arguidu ko'us sira nia oan. Tanba ne'e, husu ba tribunál atu tetu no fó pena ne'ebé justu ba arguidu.

Desizaun

Depoiz produsaun ba prova sira, tribunál konsidera arguidu provadu tuku duni dala ida iha lezada nia hasan parte karuk rezulta moras, bubu no mean. Tribunál konklui prosesu ne'e no kondena arguidu ho pena prizaun fulan tolu suspende ba tinan ida no kondena selu kustu judisiál US\$40.00.

17. Krime abuzu seksuál ba menór

Nú. Prosesu	: 0116/18 PDDIL
Kompozisaun Tribunál	: Koletivu
Juis	: Dra. Ana Paula Fonseca, Dra. Zulmira Auxiliadora Barros da Silva no Dr. Eusébio Xavier Victor
Prokuradór	: Dr. António Tavares da Silva
Defeza	: Dr. Agostinho de Jesus
Desizaun	: Pena prizaun 18

Iha 16 Abril 2019, Tribunál Distritál Dili prezide julgamentu leitura akordaun ba krime abuzu seksuál ba menór ne'ebé envolve arguidu FHB hasoru lezada AP ho idade tinan 13, iha Distritu Likisá.

Akuzasaun Prokuradór

Prokuradór akuza katak iha 27 Feveireiru 2018, iha oras tuku 18:00 kalan, lezada simu telefone *salah sambung* husi arguidu. Mezmu nune'e arguidu kontinua konverse ho lezada no hamenu ba lezada atu hasoru malu ho arguidu iha loron tuir mai. Nune'e, iha 28 Feveireiru 2019, iha oras tuku 09:00 dadeer, lezada hein arguidu iha nia uma oin. Arguidu kondús motor boot ida ba para kedas iha lezada ninia oin no haruka lezada sae lalais motor ne'e tanba atu mai Dili no fila kedas. To'o iha Loes arguidu sosa katupa no *sprite*. Bainhira to'o iha dalan klaran área Likisá nian, arguidu hapara tiha nia motor iha rai fuik no haruka lezada atu han katupa ho hemu *sprite* refere maibé lezada lakohi han tanba ta'uk muta no arguidu mesak mak han katupa no hemu *sprite* ne'e. Depoide han hotu tiha arguidu hatete ba lezada katak "*ita rua ba sorin lai*". Lezada hatan ba arguidu "*atu halo saida.*" Arguidu hatan katak "tuir ha'u deit".

Lezada mós la'o tuir arguidu ba iha ai-hun ida iha duut-laran no iha ne'ebá arguidu halo relasaun seksuál ho lezada. Depoide remata halo relasaun seksuál, arguidu kontinua tula lezada mai liu Dili. Iha lokraik, arguidu ho lezada fila kedas atu ba iha Maliana no bainhira to'o iha fatin ne'ebé hanesan, fatin antes arguidu halo relasaun seksuál ho lezada, arguidu hapara tiha nia motor no iha motor leten ne'e, arguidu ka'er lezada ninia orgaun seksuál no husu ba lezada atu halo relasaun seksuál maibé lezada rejeita. Akontesimentu ne'e, lezada seidauk kompleta tinan 14.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál husi tinan 5 to'o tinan 20 prizaun.

Produsaun ba prova sira

Iha julgamentu, arguidu nega faktu balu no konfesa faktu balun iha akuzasaun. Arguidu deklar katak iha kalan arguidu telefone no *salah sambung* ba iha lezada no halo nia konverse ho lezada. Arguidu hateten ba lezada atu mai Dili iha dadersan. Arguidu hatutan katak bainhira lezada rona arguidu atu ba Dili, lezada husu ba arguidu atu tula mós nia mai Dili. Iha dadeer, lezada hein arguidu iha ponte ninin. Arguidu rekoñese nia tula duni lezada mai Dili, hola katupa no *sprite* iha Loes no halo relasaun seksuál ho lezada maibé la to'o ezekula tanba ta'uk. Entretantu, arguidu rejeita iha lokraik bainhira sira sai husi Dili atu ba Maliana, iha dalan klaran, kaer lezada ninia orgaun seksuál tanba kalan ona no ahi motor nian mós mate. Arguidu deklar katak arrepende ninia hahalok tanba konsiente katak ninia hahalok ne'e la di'ak. Arguidu mós promete katak sei la komete tan hahalok refere hasoru lezada no ema seluk iha futuru.

Entretantu lezada konfirma hotu faktu sira iha akuzasaun no deklar katak bainhira konverse ho arguidu iha telefone, arguidu husu ba lezada atu hasoru malu iha dadersan. Iha momentu arguidu mai hasoru lezada, arguidu la ko'alia buat ida no rasta kedas lezada sae motor. Tanba ta'uk, lezada mós tuir deit. Bainhira to'o iha rai fuik ida, arguidu halo relasaun seksuál ho lezada. Depoide relasaun seksuál, lezada sente ta'uk maibé nafatin ho arguidu mai to'o Dili. Bainhira fila husi Dili, arguidu la hatun lezada iha nia uma maibé arguidu lori liu lezada atu ba Maliana.

Tanba ne'e lezada hakilar no iha momentu ne'eba lezada nia familia sira ne'ebe tuur hela iha Estrada ninin, duni tuir lezada no arguidu no toman sira iha Igreja Balibo.

Alegasaun final

Prokurador argumenta katak arguidu halo relasaun seksuál ho lezada ne'ebe ho idade menoridade. Arguidu hatene di'ak lezada sei menór maibe arguidu bosok lezada liuhusi telefone *salah sambung* atu hasoru lezada. Arguidu tula lezada husi Palaka mai Dili, maibe iha rai fuik arguidu halo relasaun seksual ho lezada. Tanba ne'e, husu ba tribunál atu kondena arguidu ho pena prizaun tinan 13 no selu indemnizasaun sivil US\$1,000.00 ba lezada hodi rekupera fila-fali lezada ninia sofrémentu.

Entretantu defeza argumenta katak arguidu no lezada kombina malu mai Dili no kona-ba relasaun seksuál konsidera katak lezada mós konsiente. Defeza rekoñese lezada sei menór maibe la prova katak lezada laiha esperénsia no relatóriu médiku ne'e la'os husi ospital ka peritu maibe husi PRADET. Defeza mós atu indefere pedidu husi prokurador ne'ebe husu indemnizasaun sivil US\$1,000.00 tanba konsidera relasaun seksuál ne'e akontese ho konsentimentu. Tanba ne'e, husu tribunál atu fó pena ne'ebe la bele limita arguidu ninia liberdade.

Desizaun

Depoiz de avalia faktu sira hotu, tribunál prova katak arguidu nu'udar autor ba krime abuzu seksuál ba menór ne'ebe previstu iha artigu 177 nú. 1 no 2 hasoru lezada ne'ebe sei ho idade tinan 13. Bazeia ba deklarasaun arguidu ho lezada nian no relatóriu médiku, tribunál kondena arguidu ho pena prizaun tinan 12 relasiona ho artigu 177 nú. 1 no kondena pena tinan 8 relasiona ho artigu 177 nú. 2. Husi pena hirak ne'e, tribunál akumulá hamutuk no kondena arguidu ho pena úniku tinan 18 prizaun.

Defeza la konkorda ho desizaun ne'e no sei halo rekursu ba kazu ne'e. Ho nune'e, tribunál halo alterasaun imediatamente ba arguidu nia medida koasaun hosi TIR (Termu ba Identidade Rezidénsia) ba fali prizaun preventiva atu arguidu la bele hases-an husi justisa.

18. Krime ofensa ba integridade física simples natureza violénsia doméstika

Nú. Prosesu : 0069/18.LIBZT
Kompozisaun Tribunál : Singulár
Juis : Dra. Albertina da Conceição das Neves
Prokurador : Dr. Nelson de Carvalho
Defeza : Dr. Nelson Borges (defensór estajiáriu)
Desizaun : Pena prizaun fulan 3 suspende ba tinan 1

Iha 16 Abril 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebe envolve arguidu CDS hasoru nia feen, iha Distritu Likisá.

Akuzasaun Prokuradór

Prokuradór akuza katak iha 24 Jullu 2018, oras tuku 08:00 dadeer, arguidu hasoru lezada iha estrada no tebe dala rua iha lezada nia kotuk-laran, basa dala ida iha lezada nia tilun-hun sorin loos no kabaas sorin loos. Arguidu mós tuku dala ida iha lezada nia kakorok sorin karuk. Aktu hirak ne'e rezulta lezada sofre moras iha kakorok, tilun-hun, kabaas no kotuk laran. Lezada ba halo tratamentu saúde iha Sentru Saúde Likisá no relatóriu médiku husi sentru saúde ne'e, anexa mós iha akuzasaun. Iha akontesimentu ne'e, lezada grávida fulan ida.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu rekoñese ninia hahalok katak nia tebe duni lezada no basa duni dala rua. Maibé nega katak la tuku lezada nia kakorok. Arguidu deklara katak nia ka'er deit lezada nia fuuk no rasta lezada ninia liman ba uma. Arguidu rekoñese ninia hahalok ne'e halo lezada sente moras iha isin loloon maibé rejeita lezada isin rua.

Entretantu lezada konfirma hotu faktu sira iha akuzasaun no deklara katak iha momentu ne'ebá nia fila husi rega modo iha to'os no ba liu iha nia tian nia uma. Lezada hatutan katak iha momentu ne'ebá nia grávida duni fulan ida no problema ne'e liu tiha fulan tolu mak nia abortu nune'e abortu ne'e la'os impaktu husi agresaun ne'e. Lezada deklara katak agora dadaun separa ona ho arguidu no lezada ba hela hamutuk ona ho ninia inan-aman iha Atsabe no kontinua ninia eskola iha sekundária.

Alegasaun finál

Prokuradór haktuir katak arguidu konfesa parsialmente ba faktu sira iha akuzasaun. Arguidu arrepende ninia hahalok maski separa ona ho lezada no lezada mós ba hela ona ho ninia inan-aman no kontinua ninia eskola. Entretantu, lezada mantein faktu sira iha akuzasaun. Tanba ne'e, konsidera katak krime ne'e akontese duni no husu ba tribunál atu aplika pena prizaun maibé suspende ninia ezekusaun.

Enkuantu defeza, husu ba tribunál atu apresia deklarasaun parsial husi arguidu no tetu mós sirkuntánsia atenuante arguidu nian hanesan arrepende ninia hahalok, foin primeiravés mai hatan iha tribunál. Bazeia ba konsiderasaun hirak ne'e, husu ba tribunál atu kondena arguidu ho pena ne'ebé justu no adekuadu.

Desizaun

Depoisde avalia faktu sira ne'ebé prodús iha julgamentu, tribunál prova duni katak arguidu hasoru lezada iha estrada no tebe dala rua iha lezada nia kotuk laran, basa dala ida iha lezada nia

tilun-hun sorin loos no kabaas sorin loos. Tribunál mós prova katak arguidu tuku dala ida iha lezada nia kakorok sorin karuk. Iha akontesimentu ne'e, lezada grávida fulan ida. Lezada ba halo tratamentu saúde iha Sentru Saude Likisá no iha relatóriu médiku. Bazeia ba faktu provadu hirak ne'e, tribunál konklui prosesu kazu ne'e no kondena arguidu ho pena prizaun fulan tolu suspende ba tinan ida.

19. Krime ofensa ba integridade fízika simples ho natureza violénsia doméstika

Nú. Prosesu : 0601/18.DICMR
Kompozisaun Tribunál : Singulár
Juis : Dra. Zulmira Auxiliadora Barros da Silva
Prokuradór : Dr. Bartolomeu de Araújo
Defeza : Dr. Germano Guterres Ramos (defensór estajiáriu)
Desizaun : Pena prizaun fulan 9 suspende ba tinan 2

Iha 18 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AGL hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha 17 Outubru 2018, oras tuku 17:00 lokraik, arguidu no lezada fila husi Hudi-laran atu ba uma. Iha dalan klaran sira hasoru ho lezada nia primu ida no hase lezada dehan "*imi fila husi ne'ebé,*" no lezada hatan katak "*ami foin fila husi mate uma iha Hudi-laran*" nune'e halo arguidu deskonfia lezada ninia amante.

Iha 19 Outubru 2019, iha oras tuku 09:00 dadeer, arguidu husu ba lezada kona-ba lezada nia primu ne'e no maski lezada hatan ona katak ema ne'e nia primu husi lezada nia inan maibé arguidu nafatin husu hela deit. Sira diskute malu no arguidu tuku dala ida iha lezada nia ulun, basa dala ida iha hasan sorin karuk no tuku dala ida ihaibun no rezulta kanek no ran sai barak. Depoizde ne'e, arguidu tama ba uma laran no foti katana atu taa lezada. Maibé bainhira arguidu sei iha hela uma laran, lezada halai ona ba iha Akademia Polísia Komoro tanba ta'uk ho arguidu nia hahalok. Aleinde ne'e, durante arguidu ho lezada moris hamutuk nu'udar feen ho la'en, arguidu sempre baku lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no artigu 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak arrepende ninia hahalok. Arguidu mós deklara katak depoizde lezada ba hato'o keixa iha polísia, lezada ba hela kedas iha uma mahon Fokupers durante loron 10 no bainhira sai husi uma mahon Fokupers

lezada ba hela ho ninia maun. Hafoin ne'e, arguidu ba buka tuir lezada no husu deskulpa ba lezada, promete sei la repete ninia hahalok no to'o agora hela hamutuk filafali.

Aleinde ne'e, lezada kontinua konfirma faktu hotu iha akuzasaun no konfirma ho deklarasaun arguidu nian kona-ba hela iha Fokupers no hela iha lezada nia maun no bainhira arguidu ba husu deskulpa mak lezada fila ba hela hamutuk ho arguidu hanesan feen ho la'en.

Alegasaun final

Prokurador haktuir katak arguidu provadu komete krime hasoru lezada maibe tanba arguidu arrepende ninia hahalok, di'ak malu ona ho lezada, husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza haktuir katak arguidu konfesa faktu sira iha akuzasaun, arrepende ninia hahalok no promete sei la komete tan krime hasoru lezada iha futuro. Tanba ne'e, husu ba tribunál atu kondena arguidu ho pena ne'ebé justu no adekuadu.

Desizaun

Depoide avalia faktu sira hotu, tribunál prova katak arguidu deskonfia lezada amante ho lezada nia primu no mosu deskuti malu entre sira. Tribunál prova katak arguidu tuku dala ida duni iha lezada nia ulun, basa dala ida iha hasan sorin karuk no tuku dala ida ihaibun rezulta kanek no ran sai barak. Depoide ne'e, arguidu tama ba uma laran no foti katana atu taa lezada. Maibe bainhira arguidu sei iha hela uma laran, lezada halai ona ba iha Akademia Polísia Komoro tanba ta'uk ho arguidu nia hahalok. Aleinde ne'e, tribunál mós prova katak durante moris hamutuk nu'udar feen ho la'en, arguidu sempre baku lezada.

Bazeia ba faktu provadu hirak ne'e no sirkunstánsia atenuante sira hanesan arguidu arrepende ninia hahalok, foin primeiravés hatan iha tribunál no di'ak malu ona ho lezada, tribunál kondena arguidu ho pena prizaun fulan sia suspende ba tinan rua.

20. Krime violasaun seksuál

Nú. Prosesu	: 0009/18.ERERM
Kompozisaun Tribunál	: Koletivu
Juis	: Dr. Eusébio Victor, Dra. Ana Paula Fonseca no Dra. Julmira M. Auxiliadora
Prokurador	: Dr. Osorio de Deus
Defeza	: Dr. João de Carvalho
Desizaun	: Absolve

Iha 22 Abril 2019, Tribunál Distritál Dili hala'o julgamentu leitura akordaun ba krime violasaun seksuál ne'ebé envolve arguidu SSS hasoru lezada AM, iha Distritu Dili.

Akuzasaun Prokuradór

Prokuradór akuza katak iha 20 Outubru 2017, oras la apura, lezada nia bin nia la'en ka lezada nia kuiñadu (ORL) atu ba haree nia tian ne'ebé moras no hameno ba lezada atu toba iha sira nia kuartu. Iha tuku 18:00 lokraik, arguidu rasta lezada no husu ba lezada katak "*orsida ó toba iha ne'ebé?*". Lezada hatan ba arguidu katak nia sei toba iha nia bin nia kuartu. Arguidu dehan ba lezada katak "*di'ak liu ita rua toba hamutuk deit ona*". Iha oras tuku 23:00 kalan, arguidu hadeer husi nia toba fatin no ba kedas iha ORL nia kuartu tanba lezada toba iha ne'ebá. Arguidu rasta lezada nia liman halo lezada hadeer tiha. Arguidu dehan ba lezada katak "*ita rua mesak, ne'e di'ak liu ita toba hamutuk deit*". Lezada rejeita no hakilar maibé arguidu taka metin tiha lezada ninia ibun. Lezada dehan ba arguidu katak "*hau ta'uk maun ORL*". Maibé arguidu promete ba lezada katak nia prontu responsavel kuandu lezada isin-rua.

Arguidu halo duni relasaun seksuál ho lezada to'o lezada desmaia. Iha dadeer, lezada nia kuiñadu ORL no lezada nia bin fila mai uma no haree lezada la toba iha ninia kuartu laran maibé lezada foin sai fali husi arguidu ninia kuartu laran. Bainhira lezada la'o sai mai, arguidu lori manta boot taka netik lezada ninia isin ne'ebé molik hela. Lezada konta tuir akontesimentu ba nia kuiñadu ne'e katak arguidu mak rasta lezada ba iha arguidu nia kuartu laran hodi halo relasaun seksuál. Hafoin lezada ninia kuiñadu ne'e telefone kedas ba iha lezada família hodi rezolve problema ne'e.

Prokuradór akuza arguidu kontra artigu 172 KP kona-ba violasaun seksuál ho moldura penál husi tinan 5 to'o 15 prizaun.

Produsaun ba prova sira¹

Testemuña ORL nu'udar lezada nia kuiñadu depoimenta katak iha oras tuku 18:00 lokraik, testemuña prepara-an atu ba haree ninia tian ne'ebé moras no hamenu ba lezada atu toba hamutuk ho nia oan sira iha testemuña nia kuartu. Iha dadeer, bainhira testemuña fila ba uma no bolu lezada maibé lezada la loke odamatan kuartu nian. Testemuña hakfodak bainhira haree arguidu sai husi arguidu nia kuartu-laran no lezada subar hela iha odamatan kotuk iha arguidu nia kuartu. Testemuña fó hatene ba lezada ninia bin atu ba rasta sai lezada iha arguidu ninia kuartu laran. Bainhira lezada sai mai, testemuña husu ba lezada saida maka akontese tanba testemuña haree lezada ninia oin hanesan ema triste. Lezada konta ba testemuña katak arguidu halo ona relasaun seksuál ho nia. Depoisde rona lezada ko'alia hanesan ne'e, testemuña telefone kedas ba lezada nia família atu rezolve problema ne'e. Maibé la konsege rezolve, tanba ne'e lezada nia família hato'o keixa.

Tribunál halo akariasau ba deklarasaun husi arguidu no lezada nian ne'ebé hamosu duvida ba tribunál. Iha akariasau ne'e, arguidu mantein nia deklarasaun katak lezada mak tama ba iha

¹ JSMP la monitoriza deklarasaun arguidu no lezada.

arguidu nia kuartu laran atu foti espelu no iha arguidu nia kuartu laran ne'e, lezada hasai hotu nia roupa. Momentu lezada hasai nia roupa ne'e, arguidu husu ba lezada tanbasá hasai roupa hotu. Lezada hatan katak "*ó hansa la mane ida*". Arguidu konsidera lezada hanesan ninia tian tanba arguidu nia apa ki'ik mak kaben ho lezada nia bin.

Nune'e mós, lezada mantein nia deklarasaun antes katak nia tama duni ba arguidu nia kuartu laran atu foti espelu maibé la hasai roupa. Iha momentu ne'ebá, arguidu mak hakbesik-an ba lezada no rei uluk lezada no loke nia roupa hodi husu ba lezada atu halo relasaun seksuál. Maski lezada rejeita maibé arguidu nafatin obriga no dehan ba lezada katak sei hola lezada bainhira lezada isin-rua.

Relasiona ho problema ne'e rezolve ka lae, iha akariasaun arguidu dehan katak nia la haruka ninia inan-aman mai hodi rezolve problema ne'e tanba arguidu sente relasaun seksuál ne'e akontese tanba hakarak ho hakarak. Entretantu lezada dehan katak nia nia inan-aman mai duni atu rezolve problema ne'e maibé família arguidu nian la mai. Tanba ne'e sira hato'o keixa.

Alegasaun final

Prokuradór argumenta katak arguidu nega faktu sira iha akuzasaun no deklarasaun katak relasaun seksuál ne'e akontese tanba hakarak ho hakarak. Arguidu la obriga no la dehan ba lezada atu responsabiliza kuandu lezada isin-rua. Arguidu mós konsidera lezada hanesan tian. Iha akariasaun arguidu mantein ninia deklarasaun katak lezada mak tama uluk ba ninia kuartu hodi foti espelu no kolu ninia roupa. Nune'e mós, lezada deklarasaun katak nia tama duni ba arguidu nia kuartu laran atu foti espelu mak arguidu hakbesik-an hodi rei no husu atu halo relasaun seksuál no promete sei hola lezada kuandu lezada isin-rua. Bazea ba faktu sira ne'e, husu ba tribunál atu kondena arguidu tuir konviksaun tribunál ninian.

Enkuantu parte defeza, husu ba tribunál atu apresia deklarasaun arguidu nian katak relasaun ne'e sira halo tanba hakarak ho hakarak, arguidu mós la ko'alia ba lezada katak sei hola lezada. Tanba ne'e husu ba tribunál atu absolve arguidu husi krime ne'e.

Desizaun

Depoizide avalia faktu hotu, tribunál prova katak lezada tama uluk ba iha arguidu ninia kuartu laran atu foti espelu. Tribunál prova katak sira halo duni relasaun seksual ho konsentimentu. Tribunál mós hetan faktu foun mak arguidu ho lezada toba hamutuk iha arguidu nia kuartu no iha dadersan mak lezada foin sai husi arguidu ninia kuartu. Tribunál la bele apura klaru lezada ninia idade tanba lezada laiha sertidaun batismu. Mezmu la apura klaru lezada nia idade maibé lezada ema ne'ebé adultu ona. Bazeia ba faktu sira ne'e hotu, tribunál absolve arguidu husi krime ne'e.

21. Krime ofensa ba integridade fízika simples ho natureza violénsia doméstika

Nú. Prosesu

: 0066/18.PCCIC

Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Nelson de Carvalho
Defeza : Dr. Januario Martins (advogadu privadu)
Desizaun : Pena prizaun tinan 1 suspende ba tinan 2 no aplika dever adisionál atu arguidu husu deskulpa ba lezada iha públiku

Iha 24 Abril 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AMF hasoru nia feen, iha Distritu Dili.

Akuzasaun Prokuradór

Prokuradór akuza katak iha 07 Juñu 2018, iha oras tuku 20:30 kalan, arguidu tula lezada iha kareta. Iha kareta laran ne'e, arguidu no lezada diskute malu tanba arguidu duun lezada halo relasaun seksuál ho mane seluk maibé lezada rejenta arguidu nia hanoin ne'e. Arguidu hapara tiha kareta no hateten ba lezada katak nia sei baku lezada bainhira lezada lakohi ko'alia sai katak nia toba ona ho mane seluk. Tanba ta'uk, lezada bosok ba arguidu katak nia toba duni ho mane seluk iha otél. Hafoin arguidu tuku dala ida iha lezada nia ulun parte loos no tuku dala ida iha lezada nia kanuruk. Depoide ida-ne'e sira kontinua ba uma maibé tuir dalan arguidu tuku dala iha lezada nia ulun parte loos no tuku dala ida iha ulun parte karuk.

To'o iha uma, bainhira lezada foin atu tuun husi kareta, arguidu ka'er metin lezada nia liman no tuku tan dala rua iha lezada nia tilun-hun parte loos. Arguidu mós fó hatene ba lezada nia inan-aman katak lezada iha relasaun ho mane seluk. Hafoin, argudu tama ba kuartu-laran no bainhira lezada tama tuir, arguidu tuku dala rua iha lezada nia hasan parte loos. Arguidu halo agresaun ida-ne'e iha sira nia oan ne'ebé sei menór nia oin.

Iha 08 Juñu 2018, oras tuku 08:30 dadeer, lezada halimar hela ho sira nia oan ne'ebé foin ho idade tinan rua iha kama leten. Arguidu tama ba kuartu laran no foti quadru/*bingkai* fotografia ida no ho quadru ne'e arguidu baku lezada nia liman karuk. Tanba ta'uk, lezada ho tanis halai tiha ba iha lezada nia avo pai nia kuartu-laran. Arguidu foti lezada nia sasan sira mak hanesan rupa, kelu osan mean rua no korenti osan mean rua no sandalla ida no lori ba tiha iha arguidu nia inan-aman nia uma ho razaun sasan hirak ne'e arguidu mak sosa.

Prokuradór akuza arguidu kontra artigu artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 husi LKVD.

Produsaun ba prova sira

Iha julgamentu, arguidu konfesa faktu sira iha akuzasaun maibé rejenta obriga lezada atu deklara iha amante.

Enkuantu lezada konfirma ho faktu sira iha akuzasaun no deklara katak arguidu obriga duni lezada atu deklara katak nia iha amante ne'ebé arguidu deskonfia ba lezada, mezmua realidade lezada laiha amante. Lezada mós deklara katak nia perdua arguidu.

Alegasaun final

Prokuradór konsidera katak bazeia ba faktu hotu ne'ebé prodús iha julgamentu, arguidu provadu komete krime tuir faktu sira iha akuzasaun. Nune'e, maski lezada perdua ona arguidu, husu ba tribunál atu kondena arguidu ho pena ne'ebé justu no selu kustu judisiál atu prevene arguidu la repete ninia hahalok iha futuro.

Nune'e mós defeza husu ba tribunál atu kondena arguidu ho pena ne'ebé justu tanba tetu ba sirkunstánsia atenuante sira katak arguidu konfesa, arrepende ninia hahalok no foin dala primeiru hatan iha tribunál.

Desizaun

Depoisde avalia faktu sira, tribunál konsidera faktu hotu provadu katak arguidu tuku dala ida iha lezada nia ulun parte loos no tuku dala ida iha lezada nia kanuruk. Bainhira lezada atu tuun husi kareta, arguidu ka'er metin lezada nia liman no tuku dala rua iha lezada nia tilun-hun parte loos. Tribunál mós prova katak arguidu foti kadru/*bingkai* fotografia no baku lezada nia liman karuk.

Tribunál konklui no kondena arguidu ho pena prizaun tinan ida suspende ba tinan rua no kondena arguidu selu kustu judisiál US\$40.00. Tribunál mós aplika dever adisionál atu arguidu husu deskulpa ba lezada iha públiku depoisde desizaun ne'e trázitu iha julgadu.

22. Krime infantisídiu no destruisaun, subtrasaun, okultasaun ka profanasaun ba kadaver

Nú. Prosesu : 0037/15. PCCIC
Kompozisaun Tribunál : Koletivu
Juis : Dra. Ana Paula Fonseca, Dra. Zulmira A. B. da Silva no Dr. Eusébio Xavier Victor
Prokuradór : Dra. Ivonia Guterres
Defeza : Dr. Rui Manuel Guterres
Desizaun : Pena prizaun tinan 4 ba arguida OAR no absolve arguidu MdC

Iha 24 Abril 2019, Tribunál Distritál Dili prezide julgamentu leitura akordaun ba krime infantisídiu no destruisaun, subtrasaun, okultasaun ka profanasaun ba kadaver ne'ebé envolve arguidu MdC no arguida OAR hasoru sira nia oan, iha Distritu Dili.

Akuzasaun Prokuradór

Iha 07 Novembru 2014, arguidu MdC nu'udar kaben na'in, namora ho arguida OAR. Sira halo relasaun seksuál subar iha otél to'o arguida isin-rua. Iha 16 Dezembru 2015, iha oras tuku 04:00 madrugada, arguida OAR telefone ba arguidu MdC atu ba iha arguida OAR nia uma aluga tanba arguida OAR atu partu. Arguidu MdC ba duni iha arguida nia uma aluga. Iha ne'ebé arguidu MdC ajuda arguida OAR partu maibé tanba ta'uk no moe ema seluk rona arguida nia lian, arguidu MdC uza hena taka metin arguida OAR nia ibun to'o bebe moris.

Hafoin ne'e, arguidu MdC ho arguida OAR futu lia hamutuk hodi arguidu MdC buti mate bebe ne'e, falun bebe iha hena ida no hatama tiha bebe ne'e iha plástiku laran no ba soe iha fatin faan obralan nian iha Komoro. Depoide soe tiha bebe ne'e, arguidu MdC la fila ona ba iha arguida OAR nia uma aluga no mós la kontaktu ona arguida. Liu tiha loron rua, arguida OAR telefone tuir ba arguidu MdC no husu tuir kona-ba bebe ne'e maibé arguidu hatan katak nia buti mate no soe ona bebe ne'e. Arguidu MdC mós dehan ba arguida OAR katak nia sei la fila ona ba arguida.

Iha loron hanesan, iha 16 Dezembru 2015, iha oras tuku 09:00 dadeer, testemuña ASP bainhira atu loke nia obralan, testemuña hetan plástiku ida iha hadak okos no haree iha plástiku laran bebe mane ida ho kondisaun mate ona.

Prokuradór akuza arguidu kontra artigu 142 KP kona-ba infantisídiu ho moldura penál husi tinan 3 to'o tinan 10 prizaun no akuza arguidu no arguida kontra artigu 224 (1) KP kona-ba destruisaun, subtrasaun, okultasaun ka profanasaun ba kadaver ho moldura penál to'o tinan 2 ka multa.

Produsaun ba prova sira

Iha julgamentu, arguida OAR deklara katak akuzasaun balun loos no balun laloos. Arguida konfesa katak nia namora duni ho arguidu MdC no halo relasaun seksuál dala barak ho arguidu tanba arguidu apresenta-an katak nia sei klosan. Husi relasaun seksuál ne'e, arguida isin rua no bainhira arguida sente kanotak moras atu partu, arguida telefone ba arguidu MdC ba iha arguida nia uma aluga hodi ajuda nia partu. Depoide, bebe moris, arguidu MdC kous sai bebe ne'e ba li'ur sein hateten buat ruma ba arguida no liutiha loron rua, arguida telefone hodi husu tuir bebe ba iha arguidu MdC no arguidu foin hateten katak nia oho tiha ona sira nia oan ne'e.

Arguida OAR mós deklara katak durante sira namora arguidu MdC sempre ba tula arguida iha nia serbisu fatin no arguida nia kolega sira mós haree ida ne'e inklui uma na'in ne'ebé arguida aluga ba mós sempre haree arguidu bainhira ba iha uma ne'e.

Entretantu arguidu MdC deklara katak faktu balun loos no balun la loos. Arguidu MdC rejenta faktu kona-ba nia ajuda arguida OAR bainhira partu no oho bebe tanba arguidu rasik la hatene lezada isin-rua. Maski nune'e, arguidu konfesa katak sira iha relasaun namora no sempre halo relasaun seksuál bainhira arguidu husi Baukau mai Dili.

Arguidu MdC hatutan katak iha 16 Dezembru 2015, arguidu iha hela Baukau tanba arguidu kontrola badaen sira ne'ebé halo hela subriñu nia rate. Arguidu iha Baukau dezde 12 Dezembru 2015 no foin mai Dili iha 27 Dezembru 2015. Bainhira to'o iha Dili, arguidu konfesa katak nia telefone duni ba arguida OAR hodi hasoru malu no momentu ne'ebá arguida OAR haruka atu sira hasoru malu iha arguida OAR nia uma aluga foun tanba arguida muda ona husi uma aluga antes.

Arguidu MdC deklara katak iha momentu ne'ebá arguida OAR mós haruka arguidu sosa foos, mina no supermi inklui pensu ba arguida OAR no bainhira to'o uma aluga arguidu deklara katak sira halo tan relasaun seksuál.

Enkuantu testemuña JF nu'udar xefi aldeia iha bairru ne'ebé arguida OAR hela antes, depoimenta katak nia la koñese arguida no arguidu no laiha koñesimentu kona-ba kazu soe labarik tanba bainhira testemuña ba iha fatin akontesimentu, polísia lori ona mate isin. Maibé, liutiha loron rua husi akontesimentu ne'e mak polísia bolu testemuña hodi investiga relasiona ho kazu ne'e.

Testemuña AB nu'udar uma na'in ne'ebé arguida OAR aluga depoimenta katak loos duni arguida aluga testemuña nia uma. Testemuña mós depoimenta katak nunka haree arguida no la hatene arguida isin-rua tanba arguida sempre sai serbisu iha oras tuku 21:00 ka 22:00 kalan.

Testemuña AdS no HdA nu'udar arguida OAR nia kolega serbisu depoimentu katak sira la koñese arguidu MdC no nunka haree arguidu ba tula arguida inklui sira la hatene kona-ba arguida isin rua.

Testemuña VdC nu'udar badaen ne'ebé hadia rate, arguidu nia subriñu nian iha Baukau, depoimenta katak nia laiha koñesimentu ba kazu ne'e maibé konfirma ho arguidu nia deklarasaun katak iha 12 Dezembru 2015, arguidu halo kontratu hela bainhira testemuña halo rate.

Alegasaun final

Prokuradór konsidera arguidu MdC la provadu komete krime tuir faktu sira iha akuzasaun tanba iha momentu ne'ebá arguidu iha hela Baukau no la ajuda arguida OAR partu no la buti bebe to'o mate. Tanba ne'e, bazeia ba arguidu nia deklarasaun no testemuña sira nia depoimentu, husu ba husu ba tribunál atu absolve arguidu.

Entretantu, prokuradór konsidera arguida OAR provadu komete faktu sira iha akuzasaun katak arguida rasik mak oho nia oan inklui ba soe nia oan. Tanba ne'e, husu ba tribunál atu aplika pena prizaun tinan lima ba arguida.

Iha parte seluk, defeza husu ba tribunál atu absolve arguidu husi akuzasaun prokuradór, tanba laiha faktu ne'ebé mak indika arguidu komete krime rua ne'e. Enkuantu ba arguida OAR, defeza husu ba tribunál atu aplika pena ne'ebé mak justu.

Desizaun

Hafoin tetu faktu sira hotu, tribunál konsidera arguidu MdC la provadu komete krime infantisídiu no okultasaun ba kadaver. Tribunál prova katak arguidu ho arguida iha duni relasaun namora no arguidu laiha koñesimentu kona-ba arguida nia isin rua inklui bainhira partu. Tanba ne'e tribunál decide absolve arguidu husi krime infantisídiu no krime okultasaun kadaver.

Iha parte seluk, tribunál konsidera arguida OAR provadu komete faktu sira iha akuzasaun katak depoisde partu, arguida rasik mak oho nia oan inklui tau iha plástiku no ba soe tiha bebe ne'e. Konsiderasaun ne'e bazeia ba depoimentu husi testemuña sira inklui bazeia ba relatóriu médiku ba mate isin ne'ebé deskobre katak bebe moris ho kondisaun di'ak no laiha problema kona-ba bebe nia saúde.

Bazeia ba prova sira ne'e, tribunál decide absolve arguidu MdC husi krime infantisídiu no krime okultasaun ba kadaver no kondena arguida OAR ho pena prizaun tinan haat tanba arguida OAR provadu komete krime infantisídiu no destruisaun, subtrasaun, okultasaun ka profanasaun ba kadaver hasoru nia oan ne'ebé foin moris.

23. Krime ofensa ba integridade fízika simples ho natureza violénsia doméstika

Nú. Prosesu	: 0239/18.DIDIL
Kompozisaun Tribunál	: Singulár
Juis	: Dra. Zulmira Auxiliadora Barros da Silva
Prokuradór	: Dr. Nelson de Carvalho
Defeza	: Dra. Tomasia Umbelina (advogada privadu)
Desizaun	: Pena prizaun fulan 6 suspende ba tinan 1

Iha 25 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AAD hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha 15 Dezembru 2018, iha oras tuku 21:00 kalan, arguidu husu osan ba lezada maibé lezada hatan osan laiha, nune'e arguidu tuku dala ida iha lezada nia kanotak sorin karuk no tolok lezada ho liafuan mal no kontinua tuku dala ida iha lezada ninia reen-toos. Aktu ne'e halo lezada sente moras iha kanotak no kanek iha reen-toos no ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade ba integridade fízika simples ho moldura penál to’o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun katak la tuku kanotak no la tuku reen-toos. Arguidu deklara katak dudu deit lezada nia reen-toos. Kona-ba tolok, arguidu deklara katak lezada mak tolok arguidu.

Entretantu lezada konfirma faktu sira iha akuzasaun prokuradór nian no deklara katak iha momentu ne’ebá arguidu ho kondisaun lanu no husu osan ba lezada atu hola tua tanba ne’e lezada la fó. Lezada mós reforsa arguidu ninia deklarasaun katak arguidu kumu liman mak dudu lezada nia reen-toos. Lezada hatutan katak di’ak malu kedas ho arguidu bainhira fila husi PRADET, arguidu foin primeiravés komete krime hasoru lezada no to’o agora arguidu la baku tan ona lezada.

Alegasaun finál

Prokuradór konsidera arguidu provadu tuku lezada nia kanotak no dudu lezada nia reen-toos. Konsidera katak arguidu arrepende ona ninia hahalok, foin primeiravés komete krime hasoru lezada no promete la halo tan agresaun hanesan hasoru lezada. Maibé tanba krime ho natureza violénsia doméstika ne’ebé aas teb-tebes no atu halo prevensaun ba krime ne’e iha futuro, tantu ba lezada no ema seluk, husu ba tribunál atu kondena arguidu ho pena prizaun suspende ninia ezekusaun.

Entretantu defeza husu ba tribunál atu apresia arguidu ninia deklarasaun katak arrepende ninia hahalok no foin primeiravés hatan iha tribunál inklui konfirma ho lezada nia deklarasaun katak sira di’ak malu ona. Tanba ne’e husu ba tribunál atu aplika pena ne’ebé justu ho adekuadu.

Desizaun

Hafoin avalia faktu sira ne’e hotu, tribunál prova katak arguidu tuku kanotak dala ida no dudu lezada nia reen-toos. Tribunál mós prova katak lezada ba halo tratamentu iha PRADET. Tanba ne’e, bazeia ba deklarasaun parsialmente hosi arguidu, konfirmasaun hosi lezada, inklui tetu ba sirkunstánsia hotu-hotu, tribunál konklui no kondena arguidu ho pena prizaun fulan neen suspende ba tinan ida.

24. Krime ofensa ba integridade fízika simples ho natureza violénsia doméstika

Nú. Prosesu : 0697/18.DICMR
Kompozisaun Tribunál : Singulár
Juis : Dra. Zulmira Auxiliadora Barros da Silva
Prokuradór : Dr. Nelson de Carvalho

Defeza : Dr. Domingos dos Santos (defensór estajiáriu)
Desizaun : Pena prizaun tinan fulan 6 suspende ba tinan 2 fulan 6 ho regra ba konduta

Iha 25 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FMX hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha 03 Dezembru 2018, iha oras tuku 18:30 kalan, arguidu husu osan ba lezada atu hola tua hodi selebra arguidu ninia maun nia tinan. Maibé lezada la fó osan ba arguidu tanba osan laiha, nune'e sira diskute malu no arguidu ka'er besi-kanu ida no hateten ba lezada katak *"loos ona ó lakohi fó osan hola tua, di'ak liu ita rua soe malu, antes ita soe malu ha'u tenke baku tohar tiha ó nia ain"*. Lezada sente ta'uk no halai sai tiha ba li'ur, maibé arguidu tuir lezada ba li'ur no ka'er lezada ninia fuuk, buti lezada ninia kakorok no hit sae rabat ba parede. Hafoin arguidu tuku dala ida iha lezada nia ulun. Agresaun ne'e halo lezada sente moras iha ulun no kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no artigu 36 LKVD.

Produsaun ba prova sira

Iha prosesu julgamentu, arguidu konfesa faktu balun no nega faktu balun. Arguidu deklara katak tuku duni lezada ninia ulun. Entretantu faktu kona-ba buti kakorok no hit lezada ba parede, arguidu rejenta katak ka'er deit lezada nia kakorok no dudu ba perede. Kona-ba besi kanu, arguidu deklara katak nia ka'er besi-kanu ne'e atu ameasa deit lezada tanba la fó osan US\$5.00 ba arguidu. Arguidu mós deklara katak maski sira separa ona maibé nia arrepende ninia hahalok ne'e.

Enkuantu, lezada kontinua konfirma faktu sira iha akuzasaun no deklara katak nia la fó osan ba arguidu tanba osan ne'e nia atu hola oan nia susubeen. Lezada mós reforsa arguidu nia deklarasaun katak sira separa ona no sira nia oan hela ho lezada iha lezada ninia inan-aman no arguidu hela ho nia maun. Aleinde ne'e, lezada deklara katak durante sira moris separa ne'e, arguidu nunka ba haree sira nia oan.

Alegasaun finál

Prokuradór haktuir katak arguidu provadu komete krime hasoru lezada tanba ne'e mezmuke arguidu arrepende ninia hahalok maibé atu halo prevensaun atu arguidu la bele komete tan krime hasoru lezada, husu ba tribunál atu kondena arguidu ho pena prizaun suspende ninia ezeusaun ho tempu naruk.

Enkuantu defeza haktuir katak arguidu konfesa faktu sira iha akuzasaun, arrepende ninia hahalok no promete sei la komete tan krime hasoru lezada iha futuru. Aleinde ne'e, sira mós separa ona, tanba ne'e husu ba tribunál atu kondena ho pena ne'ebé justu no adekuadu.

Desizaun

Depoizde avalia faktu sira hotu, tribunál prova katak arguidu komete duni krime hasoru lezada tuir faktu sira iha akuzasaun. Bazeia ba faktu provadu hirak ne'e tribunál kondena arguidu ho pena prizaun fulan neen suspende ba tinan rua fulan neen no aplika regra ba konduta atu arguidu prezenta-an periodikamente fulan ida dala ida durante tinan ida iha tribunál.

25. Krime devasa

Nú. Prosesu : 0372/17. PDDIL
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Renato Bere Nahak
Defeza : Dr. Alcino da Silva (advogadu privadu)
Desizaun : Pena prizaun tinan 1 suspende ba tinan 2 no indemnizasaun sivíl
US\$500.00

Iha 26 Abril 2019, Tribunál Distritál Dili prezide julgamentu leitura sentensa ba krime devasa ne'ebé envolve arguidu AP hasoru lezada YP, iha Distritu Dili.

Akuzasaun Prokuradór

Prokuradór akuza katak iha 17 Agostu 2017, oras tuku 17:00 lokraik, arguidu ba hasoru lezada iha lezada nia kioske no hatudu lezada nia vídeo no foto molik lezada nian iha lezada nia telefone ne'ebé lakon no arguidu mak hetan. Arguidu husu ba lezada dehan “ó hakarak ha'u *hapus* tiha ó nia vídeo no fotografia molik ne'e ka ha'u *posting* iha *facebook*?.” Lezada hatan ba arguidu katak di'ak liu hamoos tiha vídeo ne'e. Maibé arguidu hateten fali ba lezada dehan nia prantu hamoos vídeo ne'e maibé ho kondisaun lezada tenke halo relasaun seksuál ho arguidu. Lezada rejenta ho razaun nia la'os fetu arbiru nune'e lezada dehan ba arguidu husik ba se arguidu hakarak tau iha *facebook*. Hafoin ne'e, arguidu tau kedas lezada nia fotografia no vídeo privadu ne'e iha *facebook*.

Prokuardór akuza arguidu kontra artigu 183 KP kona-ba devasa ho moldura penál to'o tinan 1 prizaun ka multa.

Produsaun ba prova sira

Antes tama ba produsaun ba prova sira, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak deziste tiha nia keixa hasoru arguidu ho kriteria katak arguidu tenke hadia filafali lezada nia naran di'ak ho kondisaun ruma. Maibé arguidu lakohi tanba arguidu deklarara la'os nia mak tau lezada nia foto iha *facebook* nune'e tribunál deside kontinua prosesa kazu ne'e.

Iha julgamentu, arguidu nega faktu balun iha akuzasaun no deklarara loos duni nia mak hetan lezada nia telefone no hatudu ba lezada vídeo no fotografia ne'e. Maibé la'os arguidu mak tau lezada nia fotografia no vídeo iha *facebook* no la husu ba lezada atu toba hamutuk mak foin hamoos vídeo refere. Entretantu lezada konfirma faktu hotu iha akuzasaun no deklarara buat ne'ebé arguidu deklarara la loos.

Alegasaun final

Prokuradór konsidera arguidu provadu komete faktu sira iha akuzasaun tanba mezmu arguidu nega katak nia la tau lezada nia fotografia no vídeo iha *facebook*, maibé arguidu konfirma katak nia mak hetan lezada nia telefone no reforsa ho lezada nia deklarasaun. Tanba ne'e, prokuradór laiha dúvida ho arguidu nia hahalok no husu ba tribunál atu kondena arguidu ho pena prizaun tinan ida suspende ba tinan rua no husu mós atu kondena arguidu selu indemnizasaun sivíl ba lezada hamutuk US\$500.00.

Entretantu defeza konsidera faktu la suficiente tanba arguidu rejeita tau lezada nia fotografia no vídeo iha *facebook*. Ho nune'e, husu ba tribunál atu absolve arguidu hosi krime ne'e.

Desizaun

Depoizete tetu ba faktu sira hotu, tribunál prova katak arguidu komete duni krime devasa hasoru lezada tanba arguidu mak hetan lezada nia telefone ne'ebé iha telefone laran iha vídeo no fotografia lezada nian. Arguidu mós konfesa katak nia mak hatudu vídeo refere ba lezada mezmu arguidu nega katak nia la husu lezada atu toba hamutuk mak foin hamoos vídeo refere. Tribunál fi'ar liu ba deklarasaun lezada nian katak hafoin arguidu hatudu vídeo ne'e arguidu mós husu atu toba ho lezada mak fo'in nia hamoos vídeo refere.

Ho faktu provadu sira ne'e, tribunál konklui prosesu no kondena arguidu ho pena prizaun tinan ida suspende ba tinan rua no kondena arguidu atu selu indemnizasaun sivíl US\$500.00 ba lezada.

26. Krime ofensa ba integridade física simples ho natureza violência doméstica

Nú. Prosesu	: 0018/18 DIATR
Kompozisaun Tribunál	: Singulár
Juis	: Dra. Edite Palmira
Prokuradór	: Dr. Nelson de Carvalho
Defeza	: Dra. Laura Lay
Desizaun	: Pena admoestasaun

Iha 26 Abril 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu NdA hasoru nia feen RdJ, iha Distritu Dili.

Akuzasaun Prokuradór

Prokuradór akuza katak iha 13 Dezembru 2018, oras tuku 20:00 kalan, arguidu ho lezada ba impresta osan iha ONG Tuba Rai Metin no bainhira fila arguidu entrega osan refere ba lezada no haruka lezada ka'er metin osan ne'e. Lezada hatan ba arguidu katak "ha'u ka'er metin sa". Rona lezada hatan hanesan ne'e, arguidu hanoin lezada abuzo ka goza arguidu nune'e arguidu basa dala ida iha lezada nia hasan parte karuk rezulta moras iha hasan nune'e lezada ba hato'o keixa iha estasaun polisia.

Prokuradór akuza arguidu kontra artigu 145 KP ba ofensa integridade física simples ho moldura penal to'o tinan 3 ka multa, konjuga ho artigu 2, 3(a), 35(b), 36 husi LKVD.

Produsaun ba prova sira

Iha julgamentu, arguidu konfesa integralmente ba faktu sira no deklara katak arrepende nia hahalok no promete sei la halo tan iha futuro.

Aleinde ne'e, lezada mós konfirma faktu hotu iha akuzasaun no deklara katak hafoin akontesimentu, iha loron ne'e kedas arguidu husu deskulpa no to'o agora arguidu nunca repete ninia hahalok ne'e.

Alegasaun final

Prokuradór konsidera arguidu provadu basa dala ida iha lezada nia hasan parte karuk, maibe tanba arguidu konfesa, arrepende nia hahalok, di'ak malu ona ho lezada, nune'e husu ba tribunál atu aplika pena admoestasaun.

Defeza konkorda ho alegasaun husi prokuradór tanba konsidera arguidu konfesa, arrepende ninia hahalok, di'ak malu ona ho lezada no arguidu mak responsabilidade ba família.

Desizaun

Depoide avalia faktu sira hotu, tribunál konsidera arguidu provadu basa duni dala ida iha lezada nia hasan parte karuk bazeia ba arguidu nia konfisaun no lezada nia depoimentu. Husi prova sira ne'e, tribunál konklui prosesu ne'e no kondena arguidu ho pena admoestasaun.

27. Krime maus tratus ba kónjuje

Nú. Prosesu	: 0093/15.LILIQ
Kompozisaun Tribunál	: Koletivu
Juis	: Dr. José Maria de Araújo, Dra. Fransisca Cabral Marques no Dra. Maria Modesta de Almeida Viera
Prokuradór	: Dr. Bartolomeu de Araújo
Defeza	: Dra. Agustinha de Oliveira

Desizaun

: Pena prizaun fulan 6 suspende ba tinan 1

Iha 26 Abril 2019, Tribunál Distritál Dili hala'ó julgamentu leitura akordaun ba krime maus tratus ba kónjuje ne'ebé envolve arguidu JP hasoru nia feen, iha Distritu Likisá.

Akuzasaun Prokuradór

Prokuradór akuza arguidu katak desde arguidu ho lezada moris hamutuk hanesan feen ho la'en, arguidu sempre halo agresaun hasoru lezada. Iha loron no fulan la apuradu maibé dentru tinan 2009 to'ó 2010, arguidu halo agresaun hasoru lezada hanesan tuku dala ida iha lezada ninia oin, tebe dala ida iha kabun no tebe dala ida iha kotuk laran halo lezada sente moras iha isin lolon. Aleinde ne'e, iha loron no fulan la apuradu maibé dentru tinan 2012 to'ó 2015, arguidu deskonfia lezada iha relasaun domin ho mane seluk no halo arguidu tuku dala rua iha lezada nia kabun, tebe dala rua iha hasan no tuku dala ida iha kotuk laran.

Iha tinan 2018, arguidu tuku dala ida iha lezada nia kotuk laran, tebe iha kotuk laran no tata lezada ninia kakorok to'ó kanek no bubu.

Tuir mai iha 12 Jullu 2018, iha oras tuku 21:30 kalan, sira nia viziñu TT ba iha arguidu no lezada nia uma no hase ba lezada katak "*imi nia kafe barak loos*". Iha momentu ne'ebá, lezada ho TT tuur kleur hodi konverse. Depoide TT fila tiha ba nia uma, arguidu husu ba lezada katak "*imi ko'alia saida mak kleur liu ne'e*". Lezada hatan ba arguidu katak "*família mai uma ne'e labele dada lia ka*", nune'e arguidu tebe dala tolu iha lezada ninia kidan no tuku dala ida iha ulun. Arguidu foti fatuk tuku lezada ninia ulun to'ó ran no lori katana taa sasan dapur nian hanesan sanan, tasu no bikan.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'ó 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa faktu balun no rekuza faktu balun iha akuzasaun. Arguidu deklarata katak durante moris hamutuk arguidu la halo agresaun bebeik hasoru lezada. Iha tinan 2009 to'ó 2010, arguidu deklarata katak la tuku lezada nia oin no la tebe lezada nia kabun maibé tebe iha kotuk laran no tilun. Arguidu rekoñese iha tinan 2012 to'ó 2015, arguidu deskonfia lezada ho mane seluk tanba lezada sempre sai kalan maibé arguidu la halo agresaun hasoru lezada tanba iha momentu ne'ebá lezada iha kondisaun moras mental.

Nune'e mós iha tinan 2018, arguidu la halo agresaun hasoru lezada hanesan tuku, tebe iha kotuk no tata lezada ninia kakorok. Entretantu iha 12 Jullu 2018, arguidu rekoñese katak nia husu duni ba lezada tanba lezada ko'alia kleur ho TT maibé arguidu rejaita halo agresaun hasoru lezada tanba lezada iha kondisaun moras mental. Kona-ba lori katana taa sasan dapur

nian, arguidu rejeita no deklara katak lezada mak lori katana taa hotu sasan dapur nian no sempre lori katana ameasa arguidu atu oho. Tanba ne'e mak arguidu ta'uk no separa ona ho lezada.

Tribunál la bele rona deklarasaun husi lezada tanba lezada sofre moras mental.

Testemuña FG nu'udar lezada nia aman depoimenta katak nia hela dook husi arguidu ho lezada maibé nia rona duni husi viziñu sira katak arguidu ho lezada sempre baku malu. Aleinde ne'e, testemuña mós dehan katak lezada sofre duni moras mental hanesan lezada nia inan. Testemuña hatutan katak dala ruma lezada ka'er katana no ameasa atu oho se deit mak besik lezada.

Alegasaun final

Prokuradór konsidera arguidu komete krime hasoru lezada tanba sempre halo agresaun hasoru lezada tuir faktu iha akuzasaun mezmu iha julgamentu arguidu nega balun katak nia la halo agresaun hasoru lezada no hateten katak lezada mak sempre lori katana ameasa atu taa arguidu. Aleinde ne'e, lezada ninia aman hatete katak lezada sofre moras mental no iha relatóriu médiku husi doutor. Tanba ne'e, husu ba tribunál atu konsidera lezada ninia deklarasaun antes iha Ministériu Públiku no kondena arguidu ho pena prizaun tinan ida suspende ba tinan rua.

Enkuantu defeza husu ba tribunál atu fó apresiasaun ba deklarasaun arguidu nian katak durante sira moris hamutuk arguidu nunca halo agresaun hasoru lezada maibé lezada mak sempre lori katana atu taa arguidu. Aleinde ne'e, deklarasaun husi arguidu no depoimentu husi testemuña nu'udar lezada ninia aman katak lezada sofre moras mental. Tanba ne'e, husu ba tribunál atu absolve arguidu husi krime ne'e.

Desizaun

Tribunál hafoin tetu ba faktu sira hotu konklui katak arguidu provadu halo agresaun hasoru lezada tuir faktu iha akuzasaun no konsidera mós deklarasaun lezada ninia antes iha Ministériu Públiku tanba bele konta sai aktu sira ho klaru tantu iha polísia. Bazeia ba faktu provadu sira ne'e, tribunál konklui prosesu ne'e hodi kondena arguidu ho pena prizaun fulan neen suspende ba tinan ida.

28. Krime ofensa ba integridade física simples natureza violénsia doméstika

Nú. Prosesu	: 0077/18.ERERM
Kompozisaun Tribunál	: Singulár
Juis	: Dr. António Helder Viana do Carmo
Prokuradór	: Dr. Osório de Deus
Defeza	: Dr. Manuel Sarmiento
Desizaun	: Pena prizaun fulan 6 suspende ba tinan 1 fulan 6

Iha 29 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdS hasoru nia feen, iha Distritu Ermera.

Akuzasaun Prokuradór

Prokuradór akuza katak iha 09 Jullu 2018, iha oras tuku 21:00 kalan, arguidu ho lezada partisipa seremonia prenda. Iha momentu ne'ebá, lezada rona arguidu simu telefone husi fetu seluk nune'e lezada husu ba arguidu katak "*ó simu telefone husi se*". Maibé arguidu la hatan. Lezada kontinua husu no arguidu tuku dala rua iha lezada nia kabaas sorin, lori kopu tuda lezada maibé la kona tanba lezada halai tiha ba sira nia uma. Arguidu tuir lezada no taa rahun tiha kluna iha uma laran. Agora dadaun arguidu no lezada separa ona nu'udar feen ho la'en.

Prokuradór akuza arguidu kontra artigu 145 KP kona-ba ofensa ba integridade fízika simples, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak nia simu duni telefone maibé husi nia bin no konfirma katak nia tuda duni kopu ba lezada maibé kona moru. Arguidu rejeita kona-ba tuku no ka'er tudik hodi taa estraga kluna. Arguidu mós deklara katak depoisde akontesimentu arguidu ho lezada separa ona no arguidu hola ona fetu seluk. Arguidu rekoñese katak nia asaun hasoru lezada ne'e la di'ak, tanba ne'e nia arrepende ba ninia hahalok ne'e no promote sei la repete iha futuru maski sira separa ona. Arguidu mós prontu tau matan ba sira nia oan na'in rua.

Entretantu lezada kontinua konfirma faktu sira iha akuzasaun prokuradór no deklara katak arguidu simu telefone husi fetu ki'ik iha tenda kotuk, arguidu tuku dala haat iha kabaas no mós lori kopu tuda maibé kona fali iha moru. Tanba ta'uk ho arguidu ninia hahalok ne'e, lezada fila uluk tiha ba uma no arguidu tuir kedas lezada ba uma no to'o iha uma arguidu lori tudik estraga sira nia kluna.

Tanba deklarasaun husi arguidu no lezada kontráriu ba malu ho nune'e tribunál halo akariasauun entre arguidu ho lezada relasiona ho faktu tuku kabaas dala haat no estraga kluna. Iha akariasauun ne'e arguidu ho lezada mantein sira ninia deklarasaun antes.

Alegasaun final

Prokuradór argumenta katak mezmú arguidu nega faktu balun iha akuzasaun maibé lezada konfirma faktu sira iha akuzasaun kona-ba arguidu lori katana taa rahun kluna no halo duni asaun hasoru lezada hanesan tuku dala haat iha kabaas. Arguidu mós husik hela lezada no la tau matan ba ninia oan na'in rua to'o agora tanba arguidu hola tan ona fetu ki'ik. Tanba ne'e atu halo prevensaun iha futuru, husu ba tribunál atu aplika pena prizaun suspende ninia ezekusaun.

Entretantu, defeza husu ba tribunál atu fó justisa ne'ebé justu ba arguidu bazeia ba deklarasaun arguidu ninian inklui tetu mós katak arguidu promete la halo tan hahalok hanesan iha futuru no pruntu atu tau matan ba ninia oan na'in rua.

Desizaun

Depoide avalia faktu sira ne'ebé prodús iha prosesu julgamentu, tribunál prova katak arguidu simu telefone husi feto seluk, tuku dala haat iha lezada nia kabaas no lori katana taa rahun kluna. Konsiderasaun bazeia ba deklarasaun lezada nu'udar ema ne'ebé hetan violénsia. Tribunál konklui no kondena arguidu ho pena prizaun fulan neen suspende ba tinan ida fulan neen.

29. Krime ofensa ba integridade fízika simples ho natureza violénsia doméstika

Nú. Prosesu : 0726/18. DICMR
Kompozisaun Tribunál : Singulár
Juis : Dr. Evangelino Belo (juis estajiáriu)
Prokuradór : Dr. Nelson de Carvalho
Defeza : Dra. Joana Christina Pinto
Desizaun : Pena multa US\$60.00

Iha 29 Abril 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DC hasoru nia feen, iha Distritu Dili.

Akuzasaun Prokuradór

Prokuradór akuza katak iha 12 Dezembru 2018, iha oras tuku 20:00 kalan, lezada ba iha viziñu nia uma atu impresta iskeru hodi halo modo kalan nian. Bainhira lezada fila mai uma, arguidu xave ona odamatan. Lezada bolu arguidu maibé arguidu la loke odamatan. Lezada tuur iha liur ba tempu kle'ur tiha mak arguidu foin loke odamatan no tuku kedas dala ida iha lezada ninia ulun sorin karuk. Lezada hakilar no arguidu tuku tan dala ida iha lezada ninia kanosan sorin karuk. Agressaun ne'e halo lezada sente moras iha ulun no kanosan no ba halo tratamentu iha Sentru Saude Komoro maibé la konsege aneksa relatóriu médiku iha akuzasaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak iha momentu ne'ebá nia iha kondisaun lanu. Arguidu rekoñese ninia hahalok ne'e la di'ak tanba lezada nu'udar nia feen. Arguidu arrepente no promete ba tribunál katak sei la repete tan ninia hahalok hanesan hasoru lezada no ema seluk.

Iha parte seluk, lezada mós konfirma faktu hotu iha akuzasaun no deklarata katak iha momentu ne'ebá arguidu fila ba uma ho kondisaun lanu. Lezada reforsa deklarasaun arguidu nian katak to'o agora arguidu la baku ona lezada no agresaun ne'e nu'udar agresaun primeiru ne'ebé arguidu halo hasoru lezada.

Alegasaun final

Prokurador haktuir katak arguidu konfesa hotu faktu iha akuzasaun no konfirma mós husi lezada. Aleinde ne'e, depoisde akontesimentu, arguidu no lezada di'ak malu kedas no to'o agora arguidu mós la baku tan ona lezada. Mezmu nune'e, atu evita krime ne'e la akontese tan iha futuro, husu ba tribunál atu kondena arguidu ho pena admoestasaun.

Aleinde ne'e, defeza mós husu ba tribunál atu kondena arguidu ho pena admoestasaun tanba arguidu konfesa faktu hotu iha akuzasaun, arrepende ninia hahalok no promete sei la repete ninia hahalok ne'e hasoru lezada ho ema seluk no foin dala primeiru halo krime hasoru lezada.

Desizaun

Depoisde avalia faktu hotu, tribunál prova katak arguidu tuku duni dala ida iha lezada ninia ulun sorin karuk no bainhira lezada hakilar, arguidu tuku tan dala ida iha lezada ninia kanosan sorin karuk. Bazeia ba faktu provadu sira ne'e no sirkunstánsia atenuante sira hanesan arguidu arrepende ona ninia hahalok, foin primeiravés hatan iha tribunál, tribunál kondena arguidu ho pena multa US\$60.00 ne'ebé arguidu sei selu kada lora selu US\$0.50 durante lora 120. Bainhira arguidu la selu pena multa ne'e, arguidu sei kumpri iha prizaun durante lora 80 nu'udar pena alternativu.

Atu hetan informasaun kle'an liu tan favor kontaktu:

Casimiro dos Santos

Diretor Interinu JSMP

Diresaun e-mail: santos.cas76@gmail.com

Website : <http://jsmp.tl>

Telefone:3323883